

蘇魏公文集

萬靈著

宋太子太保右僕射同中書門下平章事司空魏國公蘇頌撰

逢年舜珩

喬孫萬靈錫經重栞

內制

晉爵耀庭

樂章

正月一日皇帝御大慶殿受文武百寮朝賀行上壽之儀樂章曲名

皇帝舉第一盞酒奏靈芝之曲

嘉瑞降靈應我皇德煜煜神芝不根而植春秋三秀晝夜五色物播詩歌聲被金石

皇帝舉第二盞酒奏壽星之曲

倬彼見象於昭于天維南有極離丙之躔既明且大應聖乘乾誕受景福億萬斯年

皇帝舉第三盞酒奏甘露之曲

泫泫零露雲英醴液和氣凝津流甘委白飴泛梓杯珠麟竹柏天不愛道聖功允格

賀冬年節詞語

內中侍御已下賀皇帝冬至詞語

伏以日南遠極驗景至於地中斗北中繩候陽萌於物種福釐均被寰海攸同伏
惟皇帝陛下感德膺期至仁御宇堯雲在望上當書物之祥禹壁惟輕獨念惜陰
之貴宜民受祿羞吝惟君降茲有永之年嗣乃無疆之厯妾等幸逢休運獲隸禁
庭仰瞻咫尺之顏願介龐洪之祚

太皇太后詞語

伏以八景朝元奉太微之遊宴五雲辨物占魯觀之機祥海寓隆平宮闈秦豫伏
惟太皇太后陛下功參化育道契清寧神靈合謀與日還而斗轉晷景循度驗歲
美而物成默而應天地之和靜以待陰陽之定保邦基而永固延福壽以無疆妾
等備數宸闈聯榮婦職仰祝松椿之算但傾葵藿之心

皇太后詞語

伏以日候清臺景下盈於尺表陽生密室氣上應於飛灰萬國同休六宮均慶伏
惟皇太后殿下德隆軒耀道應坤元躬孝養於東朝內隆陰教推慈儀於正宇益
懋聖功當七日來復之期膺萬壽無疆之慶妾等幸叨女職祇事掖庭奉觴共罄
於歡心頌履敢傾於善禱

內中侍御已下賀太皇太后年節詞語

伏以獻歲發春肇三陽之交泰履端於始為萬物之權輿恭惟太皇太后陛下繼善體仁正心率下布德行惠順時令而罔愆知人安民固邦基於不拔肇履惟新之序更增有永之年妾等祇事宸闈幸逢聖治趨玉階而致禱祈寶厯之無疆

皇帝詞語

伏以歲移木德會天運之更端厯用夏時候人正而謹始恭惟皇帝陛下大明繼照洪造無私不言而行四時靡愆消長正本而理萬事自致中和方歲旦之薦祥宜天休之協吉妾等幸叨嬪御獲隸宮庭仰瞻咫尺之顏願祝靈長之祚

皇太后詞語

伏以太簇迴律物萌震起之端招搖指寅時布寬和之令恭惟皇太后殿下仁覆邦國德配乾坤徽音不忘克嗣齊莊之美彤管有煒尤高正靜之風肇履端元倍迎釐祚妾等叨聯禁掖獲事宮闈敢同九御之誠敬上萬年之壽

春貼子

皇帝閣六首

五言

其一

乘震司春令先天布政經人時頌鳳曆農事視龍星

其二

光宅唐堯日暄和太昊春德如天溥愛性與帝同仁

其三

西昴昏當午詠訾旦在東聖君南面治常候四星中

七言

其四

律管已當人統月斗杓初建孟陬辰新修元祐萬年曆今日纔開第五春

其五

五時讀令春王禮大駕臨朝晉室儀東作西成皆有序欲使敦本使前知

其六

四時嘉節宴游稀盛德先從學士知每歲惟呈鏤金帖新春不和綵花詩

太皇太后閣六首

五言

其一

氣至風條達陽升土憤盈芸芸生物遂兩兩秦階平

其二

聖詔頒寬大天恩遍邇遐雷風孚號令草木動萌芽

其三

寶曆書推律春鴈頌獻椒年年似今日三萬八千朝

七言

其四

冬後五旬逢歲朔臘前三白徧民田朝來淑氣先時至又見春秋大有年

其五

荆楚牛人啟屬氣安豐黍腊祀倉精聖朝雖舉前朝事不為禳祈為勸耕

其六

上壽春朝覲外庭詔恩不許會公卿即時二史書謙德只使群官進姓名

皇太后閣六首

五言

其一

九扈方司啟潛陽已發春瑤觴進椒栢眉壽祝靈椿

其二

冬至四十六三陽生此辰帝令天下壽鑽燧教斯民

其三

畫景添宮漏慈闈念女功常時浴蠶日親到濯龍宮

七言

其四

東郊青幘拜春迴迎得陽和次第來風向烏竿千里應氣隨魚鑰九重開

其五

蓬萊殿裏春開宴長樂宮中帝奉親婦順母慈流美化萬方歌頌贊娥年

其六

花影遲遲轉午陰漸聞宮柳變鳴禽休呈金綵矜工巧但閱圖書鑒古今

皇太妃閣五首

五言

其一

愛敬承三殿慈柔化六宮常膺萬春祝永繼二南風

其二

甲觀翔雲覆新宮畫漏長柳條初弄色梅蘂已飄香

七言

其三

聖皇欽翼孝心存宮閣深沉母道尊初慶新陽生懈律又聞清蹕過堯門

其四

天下太平今有象宮中行樂但迎新萬年枝上看春色三素雲中望玉宸

其五

冰散瑤津波隱隱雪殘鳩鵲氣慈慈新春游豫祈民福紅傘瑤輿從兩宮

夫人閣四首

五言

其一

曉漏催銀燭新春趁賀朝御香煙馥郁宮佩影飄飄

其二

歲近寒風薄宮深愛日遲欲知春到處梅杏有新枝

七言

其三

良辰五月長新陽和氣中宵徧未央不待望春宮轉滿便趨崇慶殿稱觴

其四

君王崇儉化邦家禁掖承恩絕泰奢只擬討尋鈞看籍何曾凋刻上林花

教坊作語

坤成節集英殿宴教坊詞

教坊致語

臣聞日在鶉火當東朝誕慶之辰班集鸞庭奉聖主惠慈之宴候涼風之斯至望陰魄之初生鎗洋金奏之和懇倒玉階之祝伏惟皇帝陛下繼天開統協帝重華休承六聖之謨日視三宮之膳堯仁舜孝本天性之少成高度湯銘思日新而自戒伏惟太皇太后陛下乾坤合德軒極儲神總裁萬務之微保佑丕圖之固遐邇邇一於正寒暑平而三辰全中和致其誠天地位而萬物育屬千秋之啟瑞闢三殿以均恩鄰邦之使傳星馳絕域之貢琛膺至韶奏九成之曲人神以和蒿呼萬歲

之聲中外同樂臣濫居法部參聽輿言上祝天休敢進口號聽

口號

首秋初望斂階奠待宴千官拱大庭法部重翻慈壽曲譯場初上貝多經寶鄰雙節遙馳傳玉塞重闕盡撒扁企望璇宮同祝聖天南已見老人星

勾合曲

涼風應律天地之氣正中廣樂充庭金石之音載協望堯雲之布護延羲轡以舒遲上悅天顏教坊合曲

勾小兒隊

龍旌赫眎敬平樂之都場雞唱紆餘上章溝之畫漏爰命左觴之子恭承右翟之儀上奉宸歡教坊小兒入隊

隊名

咸英調帝樂象勺舞童裳 樂隊

問小兒隊

燕惠方宣皇歡允洽集沂童而在列聽舜樂以來庭並當總角之齡早肆結風之妙雖嘉儀矩未辨音辭進步天階各言爾志

小兒致語

臣聞厥初生民頌卨室興周之美豈樂飲酒歌武王在鎬之歡適遘慶辰盛陳燕
禮伏惟皇帝陛下德侔穹厚道繼羲軒豐宜日中萬物荷照臨之盛養以天下四
方形孝愛之風當辰火之西流近陰靈之中宿紀神符於夢月錫嘉會於需雲擊
玉撤金奏萬天之八闕望雲就日祝崇慶之萬年臣等韶齒無知禁坊綴籍願進
交竿之藝預隨疊鼓之音未敢自專伏候進止

勾雜劇

鈞天廣樂方終萬舞之儀齊庭滑稽尚聘六章之辨瞻采眉之兌說當玉殿之風
清少停促節之繁式佇觀優之樂徐賡雅韻雜劇來歟

放小兒隊

髣髴就列聽儀鳳之純音霓袖回風盡翥鴻之妙態偃旌旣畢放袂言歸再拜天階相將好去

勾女童隊

德能大於諸夏仰贊帝猷舞以行於八風佇觀樂節何彼凌波之侶來陳曳繭之
工上助宸歡兩軍女童入隊

隊名

簪纓三殿集干羽兩階陳樂隊

問女童

清商應律方歌既醉之太平長袖趨庭共獻無疆之萬壽罄霞裙而霧集望堂陞以葵傾必有剖陳一一敷奏

女童致語

妾聞祥雲入戶天開降聖之符湛露晞陽詩載燕賓之義屬金行之啟候瞻玉輦之臨軒看驛旅陳君臣胥樂伏惟皇帝陛下能哲而惠持盈守成廣庶績以釐工罄九圍而式命日致其孝承顏靡怠於晨昏歲習其祥慶節繼頌於宴衍嘉秋成之告稔應坤德之乘時觴禮九行盡獻酬之厚意封人三請祝富壽之多祥妾等適在初筭親逢盛際敢奏七盤之技交修八佾之行未敢自專伏候進止

勾雜劇

輕裾應節已觀蹈厲之工前部獻能互進俳諧之戲宮商徐引雜劇來歟

放女童隊

霓衣度曲隨夏啟以停音年木逢場騁隱辭而畢奏宜收逸綬用協多數再拜天階相將好去

興龍節集英殿宴教坊詞

教坊致語

臣聞德水澄清表一人之命世需雲宴樂薦萬壽之無疆仁鄰通二國之歡旦暮慶千秋之遇伏惟皇帝陛下賈聰稽古繼體膺期廣列聖之休聲奉東朝之慈保兵寢刑措邁帝王之高功地平天成契君臣之胥樂載臨誕日躬御廣庭王公獻甘露之觴法部奏承雲之曲臣技非朦瞽籍著工師聽立我蒸民之謠幸逢堯世有請祝聖人之語竊效華封瞻望宸嚴謹進口號

口號

赤龍應世季冬初上八開祥霓繞樞金石宣和韶九奏乾坤薦壽嶽三呼善鄰兩使星詔集拱極千官藻綬趨共捧堯鍾歌既醉洋洋朝野正歡娛

勾合曲

八音克諧天地之和斯應百獸率舞人神之感攸同上奉宸歡教坊合曲

勾小兒隊

九奏和聲已洽鏗鎗之韻兩髦侔子咸知蹈詠之儀上奉宸顏教坊小兒入隊

隊名

子衿來鄭校長袖集虞階

樂隊

問小兒隊

董裳兩兩初聞歌沛之音舞袂蹀躞漸轉浴沂之態威顏咫尺廣樂諧和必有獻陳一一敷奏

小兒致語

臣聞日在北陸會日月之初躔天生聖人將天地之交泰適遣誕彌之旦恭宣贊祝之誠伏惟皇帝陛下睿智有臨惇大成裕中昊每勤於聽政晨昏不懈於承顏學有緝熙於古先神功日就文以經緯於邦國睿問川流當九龍浴聖之辰觀萬玉盈庭之盛指南山而獻壽挹北斗以稱觴臣總角無奇執旌就列願效婆娑之技庶形郁穆之風未敢自專伏候進止

勾雜劇

德音感人盛樂稍更於節奏笑言近道前書亦紀於優辭方愛景之初長奉宴慈而飾善金絲徐韻雜劇來歟

放小兒隊

觀旅進於嚴塗式歌且舞既畢陳於衆技宜詠而歸再拜天階相將好去

勾女童隊

分行颯沓飄然曳繭之姿應節紆餘儼若交竿之狀羽旄在列鼓吹參和上奉皇
歡兩軍女童入隊

隊名

七盤儀鳳集八佾綵鸞翔 樂隊

問女童隊

麟殿深沉遐想鈞天之奏霓衣搖曳言觀激楚之工進步宸庭悉陳來意

女童致語

妾聞瑶星虹渚啟皇王載誕之符金鏡露囊有臣庶交歡之禮惟是歌詩之詠流
為祝聖之詞伏惟皇帝陛下凝命揚清儲神淵默體乾坤健順之德用致中和盡
日月照臨之區咸歸化育斗位建丑帝司執權嘉辰協慶於冬成曼壽允符於地
久妾猥聯綴兆擬贊睿神雖德與天同詎發揚於彷彿而功由樂舞庶昭顯於毫
分未敢自專伏候進止

勾雜劇

舜樂既成尚少留於八列齊諧喜隱猶附益於三章望天表之粹溫奏伶工之獻

笑再賡雅韻雜劇來歟

放女童隊

圓步方趨逐雅音而畢奏颺回風轉宜退旅以言歸再拜彤墀相將好去

紫宸殿正旦宴教坊詞

教坊致語

臣聞氣和而天地應慶集三朝燕飲而福祿來禮稱萬壽會仁鄰之講好嘉使介之在庭享禮畢陳宸歡允洽伏惟皇帝陛下膺圖御世稽古承天孝治形於家邦仁風翔於海寓馳王驚霸貫三代之質文游凱步元任群材之智勇凝成至治丕冒多方當春令之始和御廣廷而肆會周魚在藻簪纓同愷樂之歌虞鳳儀韶金石播克諧之奏臣猥緣末藝獲造彤墀聆鈞天九奏之音如游帝所效上林千人之唱竊抒蕪詞仰奉皇歡謹進口號

口號

敦牂開歲斗回杓共慶元正視朔朝仗下法官陳禹會宴開平樂奏虞韶北邦軫使星持節近侍詞臣頌獻椒共效華封人吉語勤勤三請祝唐堯

勾合曲

千官雜選廣樂鏗鏘方叢馭之晝延望天顏之豫悅引商刻羽擊玉縱金上奉宸
慈教坊合曲

勾小兒隊

詩詠君德樂舞后功允屬聖辰式資備物惟彼髫髻之侶將陳蹈厲之儀上悅天
顏教坊小兒入隊

隊名

簫韶虞氏樂歌舞沛中兒 樂隊

問小兒隊

春陽駘蕩雅奏諧和彼鴈鷀之分行逐羽旋而應節初如詠於沂水又若歌於沛
風必有所陳盍言爾志

小兒致語

臣聞夏正孟月紀庶草之權輿漢會春朝受四海之圖籍清蹕臨朝而置酒通班
拱極以稱觴仰贊休辰式陳盛樂伏惟皇帝陛下接千載之統題五精之期繩烈
祖之燕詒奉慈闈之謀訓陶鈞萬類物無疵厲之傷玉燭四時氣協中和之應薦
臨元朔夙講鄰歡禮食以勞於使人樂舞以飾乎燕喜臣等方當蒙稯欣遊泰辰

雖童子之何知亦能蹈拊歌太平之既醉欲效揄揚未敢自專伏候進止

勾雜劇

聽咸英之音備聞雅正觀旃孟之戲矧獻俳諧綴兆少留金絲徐韻上賞先悅雜劇來歎

放小兒隊

日移跌稷樂闕承雲蹁躑之態備陳獻笑之觀已畢徐收霓袂還斂羽旌再拜天階相將好去

祭文

故美人陳氏祭文

維元祐四年歲次己巳七月己巳朔十九日丁亥皇帝遣延福宮使寧國軍節度觀察留後入內侍省都知監張茂則致祭於故美人陳氏之靈惟靈早以柔淑充尚宮闈稟賦不融痛傷何已莫以穀醴慰茲營魂尚饗

故美人陳氏散塗祭文

故美人陳氏之靈眷言柔範奄謝芳年爰即散塗特陳奠酌淑靈不昧尚或歆承尚饗

故贈太師追封沂王曹佺啟殯祭文

維元祐四年歲次己巳十月丁酉朔十三日己酉皇帝遣中大夫試尚書吏部侍郎監護葬事范百祿等致祭於故贈太師追封沂王曹佺之靈惟靈奕世勲賢外門尊屬襲重侯累將之貴享上公王爵之榮居富貴而能謙處燕閒而自養未登遐壽奄謝休辰將啟散塗載深感愴聊陳薄酌用寄哀懷尚享

舉靈祭文

維元祐四年歲次己巳十月丁酉朔十八日甲寅皇帝遣中大夫試尚書吏部侍郎監護葬事范百祿等致祭於故贈太師追封沂王曹佺之靈惟靈親則舅家貴為王爵四朝寵遇位極公侯三命謙恭福兼康壽遂收神於太素俄卜兆於佳城祖載有期盡傷斯至莫以殽醴慰茲營魂尚享

下事祭文

維元祐四年歲次己巳十月丁酉朔三十日丙寅皇帝遣中大夫試尚書吏部侍郎監護葬事范百祿等致祭於故贈太師追封沂王曹佺之靈惟靈外戚賢王上公貴秩藩朝出入克保令名富貴始終存歸寃宥哉消良日式啟陰堂夙設奠筵庶殫恩禮尚享

贈貴儀林氏祭文

維元祐五年歲次庚午二月丙申朔十八日癸丑皇帝遣昭宣使康州防禦使入內侍省副都知梁從吉致祭於贈貴儀林氏之靈惟靈粵自先朝入充九御乃眷良家特承恩顧詎謂嬖風奄先晨露將啟幽堂復增遠慕尚享

殯日墳祭文

維元祐五年歲次庚午二月丙申朔十九日甲寅皇帝遣昭宣使康州防禦使入內侍省副都知梁從吉致祭於贈貴儀林氏之靈惟靈婦德之茂世胄之華恩承先眷慶集王家芳年奄謝德音不瑕殯宮設奠恤禮有加尚享

故蔡國長公主權殯前一夕夜祭文

維元祐五年歲次庚午二月丙申朔十八日癸丑皇帝遣昭宣使惠州刺史入內侍省押班馮宗道致祭於故蔡國長公主之靈有苑天孫承華椒掖粵在韶年遽淪月魄愛篤靡忘音徽永隔奠以清觴慰茲厚安尚享

故蔡國長公主墳祭文

維元祐五年歲次庚午二月丙申朔十九日甲寅皇帝遣昭宣使惠州刺史入內侍省押班馮宗道致祭於故蔡國長公主之靈惟靈分輝寶婺毓質禁庭瓊瑤

風茂蘭若早零嗟我同氣遘茲促齡嚴塗既啟精魄攸寧尚享

蘇魏公文集卷二十九

宋太子太保右僕射同中書門下平章事司空魏國公蘇頌撰

逢年

裔孫萬靈重采

外制

耀庭

中書試制詔三道

御史中丞除河陽三城節度使制

門下中執法之官內以肅正於朝案十連師之任外以總馭於藩方非有浚明之良曷膺東注之命出為屏翰特峻寵章具官某姿度清夷學蘊淵懿至言足以折衆論閱畧足以慮四方詳試事為寢觀明效頃擢才於禁侍俾長正於臺端伏奏青蒲動協盡公之義繩違白簡時推司直之風朕方綏御邇講求政實文武之道聖賢嘗述於弛張將帥之臣漢世亦求於左右眷盟津之壁壘控朔道之襟喉遂輟謨謀之賢往分節制之重授以戎律殿茲捍城於嚴正色立朝爾既得為儒之效出封加等予方示注意之私論七德宜先於安民長萬夫亦所以觀政祇服休命益圖懋勳可

中書舍人除壽州觀察使制

勅唐制觀察使統領一道廉察列邦亦古牧伯之任也故大臣出鎮近侍剖符實更處焉其寄重矣近世以來居是職者止視其秩而不綜其治權任雖異而恩數益隆非得周才未嘗輕授具官某學洞幾先慮經世務頌以文章之高第置諸清切之通班七制坦明良多潤色之美諸儒論議咸服精通之才是用擢自禁塗出分方任畀以壽春之牙節撫於淮右之封疆爾其省觀民風勤求治效副予重外之寄佇乃宿官之成可

誠群臣舉任必以賢詔

勅羣陶之謨于虞曰在知人在安民然則致治之原安民為本欲黎民之安者非得其人而委之治則主澤靡宣欲人材之叙者非選於衆而舉所知則治功莫建聖賢相戒以為至難故前世天子任大臣大臣擇長吏長吏辟屬僚皆所以同寅協恭上下交濟使野無遺逸之歎而朝有明良之詠治之至也朕甚慕焉頃者屢詔中外之臣各舉賢能之士而進任雜選愚哲混淆將何以副朕寤寐之求為時楨幹之用重敷明訓使諭至懷自今被命薦才當官任使宜各思於公舉且彙別於人流收民者必擇循良之方將領者務求精敏之類負學者須通於貫變辦事

者可任於劇煩果得其人悉宜上達朕欲試之以事觀其所長苟器業之可嘉亦甄褒之何吝倘靡諧於公議則具有於憲章昔鄒侯成功鄂秋被進封之賞陳湯獲罪張勃蒙既死之誅治古若斯前規可鑒咨爾有位勿忘盡公

皇族出官勅詞

牒奉勅自我祖宗惇叙邦族大則疏封於爵土次則通籍於闈臺竝留京師參奉朝請然而世緒寢遠皇枝益蕃屬有親疎則恩有隆殺才有賢否則祿有重輕今而一貫於周行是亦奚分於流別雖睦婣之道誠廣而德施之義未周故廷臣數言宰司繼請謂宜定正限以等彝朕維親戚之間經史有訓漢唐之世典故具存或以九族辨尊卑或以五宗紀遠近或聽推恩而分子弟或許自試而效才能或宗子之賢得從科舉或諸王之女自主婚姻盡前世之所行顧當今之未備況我朝制作動法先王豈宗室等衰乃無定者因俾群公之合議將為一代之通規載覽奏封具陳條目以謂祖宗昭穆宜從世世之封王公子孫抑有親親之殺若乃服屬之既竭洎於才藝之竝優在隨器以甄揚使當官而勉懋至於任子之令通婚之儀凡曰有司之常一用外官之法僉言既允朕意何疑告於將來遂頒明命噫自義率祖既殊升降之文因時制宜斯盡變通之利咨爾宗盟之衆固多博識

之倫奉承新書當體朕意

翰林侍讀學士高書禮部侍郎集賢殿修撰范鎮可依前官充翰林學士

勅學士職親地顯非他官之擬倫內則承宥命之權輿外則預清問之訪問向非明於國家之體與夫老於文學之流疇克周旋副我優待以爾具官某識通器遠內勤外和擢於儒林置在禁序書命西掖則辭訓已孚視草北門則論思有助聞嘗試以政事故使治於輔藩能平易而近民賦中和而樂職不待滿歲召還近班眷久侍於經闈且垂成於廟史衆譽厥善朕嘉乃勤復咨鴻藻之華再入內庭之直夫惟號令之慎出資獻納之忠言成筆端澤布天下茲儒者之榮遇昏爾鎮之踐更益告猷為用符眷倚可

觀文殿學士吏部尚書趙槩可太子少師致仕

勅夫起儒者而仕公卿享高年而歸印綬功名寵祿輝煥於一時好德康寧幾備於五福非夫吉履素茂聞望特隆克全始終益亦鮮矣以爾具官某躬秉一德用兼數器文竟增典冊之美事業本經綸之才在仁祖英考之朝已推宿哲預機庭宰軸之議屢告嘉謨逮予纂承寶輔初政方仰成而尊禮俄委柄而願聞作屏東州甫就燕休之適為時大老尚期咨度之來而累章引年抗志彌篤倘諉以事豈

曰優賢東儲六傅之班上臺三公之亞俾歸榮於里第且遂志於養頤彌壽太和益壽遐壽茲朕所以勤勤於卿而不忘也可

侍御史張紀可司封員外郎

勅具官某御史紀綱之任治書謂之憲端南宮清要之司左曹號為華選惟是踐更之美實均出入之資以爾擢自文科屢登郡縣之最拔於遠守俾幹賦財之煩朕嘉其納忠置於言地自參持於臺務能振整於事綱方幅集聞真繩無隱屬議言之應陟加閱實之既優移進望郎之華且聯主爵之副宜欽承於渥命尚思告於謀猷行竹遠圖以副甄用可

屯田郎中權發遣三司度支判官吳幾復可都官郎中

勅具官某先皇帝嘗謂財計之司地要事叢艱於數易故於劇部為擇佐僚且更久職之科以待不次之舉爾幾復實以幹治應乎選求比聞坐曹最號辦職今有司按閱謂爾頃倅邊州課登優格自改郎秩歲滿三期較其在事之勤竝應考功之令中都掌隸雖曰次遷支度均財尚仍故守惟爾經術足以飾吏文敏足以治煩益思遠猷用副甄擢可

都官郎中集賢校理吳彥先可司封郎中

勅具官某恭惟先帝留意藝文以謂養育賢材莫先儒館因命丞弼竝薦所知覆以文詞授之美職者蓋亦眾矣朕嗣位之始爾彥先應詔來上是用試爾內禁置於書林皆所以成先帝之美也今有司又言爾正秩郎內凡滿四期校其積勤南應遷比是用昇爾主爵列於左曹亦所以旌服職之勞也夫賢者之於國家豈待爵祿而後勸惟茲敘進之法蓋亦功令之常爾其休承益懋遠業可

侍御史呂景可司封員外郎

勅昔有唐之世由御史而陞省郎者號為清選蓋以居紀綱之地則糾繩為煩贊喉舌之司則典領為重我得佳士俾之迭居以爾具官某文雅清修端方勁正早仕州郡廉能之譽聞於時其在朝廷獻納之言無所隱近召從於州榮俾復踐於臺端方倚忠規之良遽上年庸之最法當進秩寵以左曹所以厲風節之高而副清望之擢也昔劉向有言忠臣雖在剛畝猶不忘君矧爾踐厯清塗進榮華省尚思往訓無忘納忠可

岐王府記室叅軍尚書度支員外郎直史館李育可司封員外郎

勅具官某今夫任郎官者以左曹為貴升文館者以太史為先向非大雅博達之倫不在優選兼直之比選任之際良亦艱哉以爾早擢甲科薦游書府召從方守

置在王藩使吾親賢日聞道誼之益緊爾善職不懈討論之勤攬攸司之議年嘉奏課之應格進聯主爵之副以增望府之華漸履榮階益收後最可

翰林學士右諫議大夫知制誥滕甫可給事中充翰林侍讀學士知瀛州

勅朕東求時彥登置近班內則預基命之謀外則委折衝之寄出處雖異眷遇實均方將詳試於事為是用優加於寵數具官某文學足以濟時用論議足以輔朝猷升之板垣則詞訓擅其美擢於憲座則啟沃盡其誠洎進直於複門益見推於善職朕以瀛闕藩會之要朔野災震之餘謀帥維難得爾良重趙張之治京劇已擅宿名頗收之在棊林宜膺間寄對易金華之侍仍遷瑣闥之聯俾綏定於一方且盡護於諸將夫牧民貴乎安輯守邊務於威懷以爾敏明往必有裕佇聞職政之美用副虛懷之咨可

右諫議大夫李肅之可依前官充天章閣待制權知開封府

漢制以郡國二千石高第者入守京兆故彈治輦下常為得人矧予近序之賢久厯雄藩之寄委之尹正必有佳聲具官某生於名門素號敏達出將漕務入佐邦財心計有餘治績尤著近以河濱地變朔土民騷爾職撫邊疆日勤綏定繕完壁壘安輯民居曾不踰時克有成績是用陞雲章秘近之列典王畿浩穰之都豈特

旌寵於事勞抑亦竹觀於才美往膺殊渥毋替後勤可

虞部郎中張兌可比部郎中

勅具官某朕沿大比之制考庶官之成績其治能進以秩等所以均恩於在位而示勸於至公也今有司以爾有宿官之勤應考課之令宜叙遷於郎列仍故守於州封往復休恩益圖後最可

前屯田郎中王覺前殿中丞袁庭芝前著作佐郎侍其璋可並舊官服闋

勅具官某等服勤效智早列周行銜恤去官近終喪紀日月云邁編禫已除宜還簪紱之榮來就班聯之火秩雖不改命則維新勉思移孝之方以竚揚名之效可

屯田員外郎李鑑可都官員外郎虞部員外郎黃宋卿可比部員外郎

勅具官某等古之在官者久而不遷故有三歲大比之法今之從政者間或無職故議增年考課之令雖責實稍異而較勞則同以爾等夙以吏資置之朝序出敷民政竝著事功覽齋伐之應條命推恩而進秩勉圖來效副我甄褒可

職方員外郎董公彥可屯田郎中比部員外郎馬中庸可駕部員外郎屯田員

外郎黎持正可都官員外郎國子博士司卞盛和仲可竝虞部員外郎太

子中舍張璿可殿中丞

勅具官某設官以等則眾職舉有勞者進則群臣勸歷古為治茲道實先以爾服在朝聯夙推幹裕歲月之效甫臨比最之期闕閱之資亦應叙遷之典遞增美秩用獎久勤益念修方以圖來效可

駕部員外郎李茂先可虞部郎中屯田員外郎馮鎮可都官員外郎虞部員外郎蔣僅可比部員外郎

勅具官某等昔有虞之熙眾功也九載而能否別周官之比群吏也三年而治最陞夫授方任能校功書過久則實已廢速則賞或僭四歲遷黜我得其中以爾等夙以吏資仕於朝廷自登郎選屢試政條率職之勤訖無曠事議年之課且應書功並進等於右曹示疇能於往效尚思懇勉無忘欽承可

前石州方山縣令王佐可著作佐郎前泗州盱眙縣令吳天常睦州司法叅軍前監温州在城商稅務傅燮可並大理寺丞

勅具官某等久從務令之職咸有幹廉之稱使者交章攸司覆實言爾最狀甫應遷科朕親御便廷訾相其質可以才使因而叙遷進屬上臺之聯益思良吏之守可前權潤州觀察推官方仲謀前山南西道節度推官郭子彥可並大理寺丞前權皖州軍事推官譚仲衍可著作佐郎

勅具官某士之由選部而升京司者榮進之階漸也非計最如格未嘗輕授今薦者以爾有幹蠱之譽而有司又言應陽明之典臨引便坐擢為王官爾其益思登進之艱終圖遠到之效副我甄任不亦休哉可

前賀州錄事參軍夏候戡可太子中舍致仕

勅具官某方強而進不能則止益仕者之常分也以爾服官累久視復寡尤來集銓臺願還王事其進宮坊之秩俾從鄉閭之居遂而宴休可謂光寵可

前秘書省校書郎胡行修可舊官服闋

勅具官某向從京省去執親喪當歲月之再期屬緇織之畢祭宜還舊次式漸榮階倘懷報德之誠益念移忠之效可

太常寺少卿李獻卿遺表男景真可試將作監主簿

勅某乃父仕登朝守秩亞卿曹奄茲淪亡當有優恤以爾保家之秀俾霑延世之恩益慎操修克承餘緒可

皇城使向寶可貴州刺史依舊皇城使內殿崇班閤門祇候段充可內殿承

制餘依舊

勅具官某等夫爵祿班等所以待有勞之臣勞而不圖何以示勸爾等夙以精悍

之質禦於疆候之衝能戢種苗稟信威令攬元臣之列削述成效以良多爰嘉乃勤遞增爾秩或視專城之守或承內著之聯俾以寵名益重邊圉竝為優異之典更佇撫綏之謀可

前內殿承制李從吉可舊官服闋

勅具官某封疆之臣既勤撫輯歲月之勞宜有甄贖矧帥畧之上功顧恩書而豈吝以爾早從武弁寢服使聯自擢守於邊城能悉心於戎務稔聞治最加有年勤就陞內使之聯不易舊行之寄益思來效以答寵榮可

供備庫副使王諤可西京左藏庫副使

勅具官某內使之聯副介有等考課之序遷次惟優非其累勞豈應明陟以爾夙以才武服於禁庭數臨外局之繁方督中都之役校年庸而應最躋班等以陞華更厲爾能以稱斯寵可

前內殿承制李從吉可舊官服闋

勅具官某早登勇爵嘗效邊勞俄服親喪既終祥祭奉追書而來集還舊次以叅榮服內著之聯無忘厥守展四方之事佇集爾勞可

前隴州錄事叅軍賈選可澧州別駕致仕

勅具官某服勞吏役歷職郡綱今以老而自言嘉其勤之有素俾參州佐之秩以
為鄉閭之榮既遂爾私是亦優典可

涇州管内觀察使舒國公從式奏百姓醫人李詢可試國子四門助教不理

選限

勅具官某嘗學禁方能通診法近宗侯之苦疾訪高手以視調屬覽奏封具言爾
力因其樂喜之應假以版授之榮祇服新恩益勤善術可

回鶻進奉大使李延吉可右監門衛將軍

勅具官某代籍西安久陶於聲教職修方貢不替於忠純涉疆候以良勤護琛珍
而遠至嘉其誠款需以恩章特陞環尹之聯俾重裔夷之觀深思恭順以答寵嘉可
茭村族軍主李懷德可本族都軍主

勅具官某屬者羌落內侵偏師外禦爾在捍邊之列自陳折首之功守帥為言累
勞可尚特推榮於命秩俾率屬於戎豪祇服休恩弗忘忠蓋可

蘇魏公文集卷三十

宋太子太保右僕射同中書門下平章事司空魏國公蘇頌撰

逢年

高孫萬靈重栞

外制

權庭

觀文殿學士兵部尚書知青州歐陽修可檢校太保充宣徽南院使判太原府
勅國家規恢裔邊並建帥領惟河汾之一道搃獯狁之二陸爰咨哀路之賢往付
并門之筦仍遷近府用壯輿藩以爾具官某道德文章為時矜式謀猷忠亮預政
累朝自獲解於台司已再更於郡寄委遠時柄爾雖樂於燕安尊任賢能朕豈忘
於寤寐眷言大敵方擇守臣俾從表海之邦就改近邊之鎮班通四貴所以褒寵
於舊勲節制諸戎所以倚成於外閫惟爾同寅之德體予注意之隆亟即新州毋
辭遠畧可

前戶部尚書叅知政事張方平可依前官充觀文殿學士知河南府兼西京
留守司

勅三年之喪聖賢不可踰禮六職之任朝廷所以仰成粵予鼎任之良近闕首麻

之制甫更中月當復通規就委居留之權固無中外之間具官某蘊天人相與之學挺金石不移之心被遇累朝極清崇於禁復逮予初政遂權贊於鈞衡適告訐謨俄嬰鉅創服衰去位久深樂棘之情蹙燧變時已畢編織之綵矧任崇於體貌方渴佇於猷為姑還革履之朝仍錫玉符之寄殿塗秘職益優異於老成洛宅中折俾尹釐於王會是惟付畀之重式示眷眄之隆宜諒至懷往欽成命采務同寅之守副茲注意之勤可

翰林學士右諫議大夫知制誥王陶可依前官充侍讀學士知蔡州

勅左右之臣內則參毗於國論屏翰之任外則綜輯於民經矧予禁複之賢屢啟偃藩之請特推寵數使遂宴安以爾具官某風節峻凝謀猷敏濟預兩朝之言責陪望苑之雋僚肆朕纂承間咨忠益典領臺閣嘉言日聞於前宣布中和惠問風傳於下入總大計再登內庭方矧有為之圖俄聞移疾之告懇辭事柄析析州符既重違於至誠姑為擇於便郡陪京而近莫如淮右之優進職而行遂易金華之秘爾其敷施寬政迎導粹和神明泰寧則何恙而不已邦國順否當乃心而不忘深體眷懷尚期來譽可

翰林學士承制兼端明殿學士翰林侍讀學士給事中知制誥王珪可禮部

侍郎

勅惟我仁祖享國永年威德成功將傳於萬世備言廣記必藉於三長間咨博洽之材入預刊修之職筆削之載方覽奏篇之來感愴之餘良嘉善志之美以爾具官某文章高第經濟閎才承密命於內庭屢聞忠益領諸儒於東觀甫就編研追書四紀之見聞大備一朝之典法言觀類例成自裁成惟史氏之懋官有前書之舊比宗伯典禮天臺貳卿用旌善職之勤且慰述先之念欽茲寵渥體我眷懷可翰林學士守尚書禮部侍郎范鎮可守尚書戶部侍郎

勅夫廣記備言之書編年繫日之史古稱善志時謂難才矧乎仁祖之聖德神功一朝之文紀武律載述之任刊輯良勤既克成於信書宜顯褒於直筆以爾具官某識通器遠學富文高內庭嘉獻納之謨東觀預編摩之選發凡起例有古良史之風積思潛精成我一王之法奏篇甫上懋賞宜優中臺常伯之聯左戶地官之貳叙陞厥秩用獎爾勞往膺遷渥之華益佇猷為之美可

尚書祠部員外郎充集賢校理陳繹可度支員外郎依舊充職

勅具官某昔揚雄稱太史遷所記謂之實錄然則實錄之名蓋取夫不虛美不隱惡而為言也今夫紀一朝之典法事有巨細辭有詳畧載述之際去取良艱必資

衆才以裨闕漏以爾博學敏用久次詞林往行前言多識古義命討論於史觀助刊約於信書發例惟精奏篇益善序進望郎之秩且甄載筆之勤茂對寵章無忘勉懋可

昭宣使入內侍省內侍副都知利州刺史充本州團練使張茂則可宣政使餘如故

勅先帝之史朕不敢輕自丞相至於儒館之士預其職者更五六人焉可謂重矣而又擇親信之臣以闕掌世務所以欲其謹嚴而無廢闕也以爾具官某端良於恪久侍禁庭典領周旋備觀才致總史闡之政令更歲律之失涼屬其成書嘉乃勤事寵進使名之美用增近序之華往服恩章益宣忠盡可

尚書刑部郎中充天章閣待制再任知渭州都總管經畧安撫使蔡挺可右諫議大夫依前充天章閣待制令再任

勅朕以平涼之郊益戎夏之要乃眷西顧每念謀帥之艱既得其人良思責任之久就加顯命式壯塞垣以爾具官某才識敏明士論嘉美服朝之寵陟天臺禁閤者累年由陝而西更濬節將牙者三府矧自殿臨於藩隴益能控制於氐羌保障繕完士伍服習方倚保邊之重遽聞換郡之求雖諒乃誠尚難其代夫將帥戒乎

數易鄰國畏乎宿名宜躡進於右坡俾重留於外間爾其體國深意毋憚久勤講邊善謀克終厥譽坐收遠畧用副眷懷可

屯田郎中張次立可都官郎中

勅具官某六書之學世久不傳文字舛謬通俗交錯非夫貫習於古隸詎能訂正於簡編以爾博學名聞潛郎歲久游心墳史之暇刻意蒼雅之餘典校鴻都既復中經之備體章言字學多沿鏤版而失真刊而定之成篇來上嘉其積思寵以一官往惟欽哉膺茲顯命可

未復舊官人都官員外郎董經臣可職方員外郎

勅具官某或謂赦非公平之典然而在仕者或緣註誤而寘於理非有寬宥則廉良之士曷由而洗滌乎以爾向典方州縱逸有罪在法當黜度情非它屬逢慶需之恩固有原官之比復還舊秩仍列清郎毋以一青之微而忽遠圖之效可

屯田員外郎鄭顛可都官員外郎太常博士陳絃可屯田員外郎祕書丞彭

慥可太常博士

勅具官某士之通籍於朝而服職於外積日累久且四期矣既克成於治效又能逭於過尤茲而不遷何用勸善以爾詞學中科選閱陞閭臺薦者稱其廉勤有

司上於課最咸應恩格宜有甄揚稍進一官之榮使有群吏之勸體茲恩渥懋乃事功可

全部員外郎沈扶可司勳員外郎虞部員外郎張宗道可比部員外郎

勅閩臺之遠昔重為郎閩閱之優法當遷秩屬攸司之上課加在事之厯年用示恩褒具如令格以爾具官扶仕富吏資之敏任更使節之繁以爾具官宗道地承世胄之華職預計籌之佐咸有善狀應於最條況久陟於省闈宜遞陞於官次等功清列司計右曹嘉爾有勞使之進拜茂對醜庸之命益思任責之艱可

屯田員外郎李景融等轉官

勅具官某南宮為郎昔號清要太宰計吏法有黜陞嘉上課之應條宜甄能而進秩以爾士科擢秀朝會參華蒞官聞敏給之稱布政協廉良之善省闈承務早踐於六聯恩典陟明復遷於一等服我甄褒之渥勉思忠盡之誠可

秘書丞充三司勾當修造案公事孔嗣宗可太常博士餘如故

勅具官某夫列朝闈之籍雖以次遷參計省之僚本由才選閱乃年資之久嘉其治等之優所宜甄醜稍進班級以爾學蘊充茂才資明敏試吏有勞知已言狀寘之大農之屬亦既宿官陞以奉常之聯聊用旌伐欽承獎擢之命益念忠良之為可

國子博士李及可虞部員外郎

勅具官某仕宦至尚書郎者在古為要今雖不涖省事徒假名秩顧其品列猶為顯華以爾策名清時通籍闈者入奉朝請出為民官結課有司校勞累歲擢進中臺之序茲為近路之榮祇服恩褒勉勤績用可

守殿中丞姚稱可國子博士

勅具官某國家校群吏之勞有四載之比雖積日頗久而辨才益精苟非顯庸不在遷比以爾仕列通籍職更治民幹敏有聞循廉可任爰覽計書之上當陞班著之榮祇服恩華勉收治效可

前權大名府推官蘇轍可西京留守推官

勅具官某富文敏學早擢秀科大對危言繼膺清舉方講圖於才畫助寬析於計條遽有開陳願從補外復優叅於賓幕且贊務於留都既遂爾私益思遠用可

西京左藏庫副使高遵裕可依舊西京左藏庫副使兼通事舍人

勅具官某惟上閤贊司之職益右列清要之塗非夫材稱顯聞不得兼領以爾勛門華緒內使宿名久戍邊防克奮忠毅圖上方畧嘗聞善謀守圉封疆方收遠績擢預典儀之秩用增武爵之榮益思盡規以答殊寵可

皇城副使桑湜可西京左臧庫使

勅具官某并絡之野畫為二川帥節撫臨每擇近班之彥兵防督護參咨內使之良以爾素練機鋒累更事任提兵隴右已著能名易地劍南存分優寄仍進京師之長用光蜀道之行體我推恩更思竭節可

梅州刺史充本州團練使王振可左千牛衛大將軍海州團練使

勅內領諸衛外總團兵視武畧以甚高非勞臣而弗處將優舊望使得兼榮以爾具官某拳勇之謀早司禁旅公忠之守屢試邊防閱其年事之侵思有華階之寵陞之環列仍彼使權既遠處於安榮尚不忘於報稱可

西京作坊使知忻州孫京可尚書虞部員外郎

勅具官某士之懷才抱器惟所以見用於時然後功名可冀豈有文武之異哉爾向列朝闈薦者謂爾通知四夷故易以內使之名而付以邊兵之寄屬時無事不克設施章言自陳願還故守郎官清要復以命爾治人循法皆爾所宜惟其盡規乃有成效可

內殿承制王克昌可供備庫副使

勅具官某守邊之吏以綏靖為功滿秩有勞寵褒何吝爾向由廷列往護蠻陬撫

字之勤沈無曠累廉平之守復遠過尤宜進秩於內司用甄能於遠效荷茲優典深盡忠規可

內殿崇班任雍可內殿承制

勅具官某夫列職廷中秩視閤臺之貴提兵塞下任均師律之嚴皆右著之優遠非良才而靡稱以爾精剛之質久事周行積累之勤亦應比最特遷承於朝制仍往護於師屯益思盡忠乃克任事可

樞密院兵房主事李景先可吏房副承旨

勅具官某宥密之嚴地均公府丞史之任職專吏門雖曰次遷尤為遴擇以爾首公勤辨在事謹廉嘉積久於勞動當進聯於曹務益宜欽慎思對恩榮可

東頭供奉官南永可內殿崇班

勅具官某內殿之列秩有二等皆通籍於朝閤而隸名乎樞府由三班吏以次遷者校其年資亦已久矣惟爾治效有應斯格擢陞近序所以甄勞架堅瘁勤用稱恩獎可

東頭供奉官竇世隆可率府率致仕

勅具官某七十致仕禮經之訓也爾為吏有年飭躬寡悔願筋力之難強豈簪裳

之可榮嘉其自陳宜有優渥陞以東儲之秩俾為居里之榮祇服恩私足慰遲暮可
奏舉人前知權夔州節度推官張擇言等改官

勅具官某等九卿之屬皆有佐丞視其閒要以為等差非得廉良不在茲選以爾
等或詞科之秀或世緒之華試吏有勞薦章交至宜各因於資籍俾並列於京司
被茲寵擢之優益念公忠之報可

奏舉人前杭州昌化縣令章蒙等改著作佐郎

勅具官某在昔明世莫重親民之官肆我治朝爰開舉吏之法得人既效懋賞必
行以爾術業甚修廉方自表久從銓筦之調已試宰字之能累歲有勞知已言狀擢
序蘭臺之秩漸階鸞黨之榮益慎持操乃副甄獎可

前權雄州防禦推官張天占前天平軍節度推官知遂州遂寧縣事韓纒前
權府州軍事判官張禧可並大理寺丞

勅具官某等或決科從事或延賞入官並有良吏之資外從諸侯之幕臺章言狀
銓筦條勞辦職者敏幹可稱字民者拊循有效用擢王官之列且丞刑寺之聯勉
思後勤勿渝素守可

試秘書省校書郎知海州海豐縣黃長裕可大理評士

勅具官某瀕海之郡去朝廷遠甚而寇賊乘險剽掠使民不能寧居斯長人者之所共病也以爾為令於彼能勤厥官親格姦克遂平宿黨擢升京寺之籍用勸才勞之臣往服優恩益圖後效可

太子少師致仕趙概奏男光祿寺丞元緒可大理寺丞親孫大理評事嗣真可光祿寺丞

勅具官某等大臣請老當推寵異之恩世嗣傳家爰錫顯揚之命以爾等蚤由門調並列京司屬我耆英歸休里第特厚賞延之滄遽增祿秩之榮列卿之丞初仕為貴宜勉遵於緒業庶能保於慶宗可

行太常寺奉禮部席延年可行大理評事

勅具官某仕者世祿所以承家官以賞延是亦近古復沿考涉之比間有次遷之榮循致華階由此始矣爾之資履既應於吏條國有彝章當陞於班等往承斯滄益念後勤可

丁憂人前寧州司戶叅軍楊傳可特免持服充忠武軍節度推官同管勾鄜延路機宜文字

勅具官某親喪之重情不可違王事之嚴禮有權奪爾為邊州掾以才略聞遭憂

免官倚廬行服宜起腰於墨經且陞案於賓延往典軍書而贊帥略毋堅爾恤當體在公可

文林郎守南康軍都昌縣令裴士章等職官知縣

勅具官某縣令之於民最親也一失其人則下有受敝自保任之法興而多以稱職聞者甄勞獎善其可廢乎惟爾之能實應茲選宜陞賓幕之秩再付邑章之榮爾其善撫元元克終厥問褒擢之典吾豈吝焉可

德妃苗氏奏遇南郊乞親侄習進士苗仲淵可將作監主簿

勅某朕親祀郊丘布慶中外眷惟妃戚之族例有賞延之科而爾之諸姑職崇宮掖言爾有立祈寘仕階京籍起家勉思官學可

儒林郎前乾寧縣司理叅軍孟英可試大理評事

勅具官某爾久從選調厯職掾曹齋闕天官之詮試吏丞相之府事稱勤辦法應次遷姑從事於臬藩典支計於外府宜收課最矜副甄揚可

翰林院傳寫待詔承務郎守少府監丞顏和可河中府榮河縣太寧廟令

勅具官某居工技之列擅寫照之能執事有年服勞可紀因自陳於暮齒願退居於祠官既遂爾私宜勤厥守可

右班殿直孔錡可洛州別駕致仕

勅具官某爾為吏有勞擢陞任籍效官寡過進列廷班年未至而告休力不能而知止宜遷州佐之秩使遂退居之安既適爾私是謂優渥可

登仕郎守利州文學趙象可利州司馬

勅具官某登名為吏坐法奪官向叙散曹適逢大需稍遷典午之秩庸不棄瑕之恩可

溪洞高州四甲巡檢田守元男洪惟可銀酒監武充溪洞高州四甲巡檢

勅具官某介於邊裔服我聲明屬乃父之云亡攬邊臣之列奏命爾襲職特示推恩美秩榮階並優於渥澤深溪重嶺就俾於邏巡宜罄忠純用保寵祿可

河北都轉運司空名攝助教五道

勅漢法使民入粟縣官得以拜爵今爾以貨貨應幕州郡得不推恩而獎勸之假秩一命俾為爾榮益思良心以對甄渥可

磁州空名助教二道

勅某朕聞民阻饑遣使賑恤且俾土豪之入粟用助縣官之振窮爾財雄州閭義服鄰里來應募格願輸滯藏嘉其嚮勤之誠錫以甄旌之命尚安鄉校足為寵光可

蘇魏公文集卷三十終

蘇魏公文集卷三十一

宋太子太保右僕射同中書門下平章事司空魏國公蘇頌撰

逢年

裔孫萬靈重祿

外制

耀庭

右諫議大夫權御史中丞呂誨可落御史中丞依前官知鄧州

勅御史之職所以表正朝位分判忠邪舉錯或違綱領疇寄以爾具官某分卿華
胄文學清流踐履閭臺休有風力伏蒲抗論稔聞獻替之嘉冠豸在庭方好猷為
之補而屢陳奏牘嘗毀輔臣黨小人交構之言以肆罔上無根之說比令辨析遠
服過差四句係中添朕雖務於含容爾吳安於要近姑仍正諫之秩出權南陽之麾噫
正色立朝固賢士之所守言事失實在典憲之當行既觀過之則然亦原情而非
甚尚從薄責俾就外遷勉勵有循究理自訟可

翰林學士兼侍讀學士寶文閣學士禮部侍郎呂公著可守御史中丞

勅朕惟御史之任內承本朝之風化外為列位之表率治古所尚官儀特崇諒非
正人未易稱選以爾具官某文章識度諸儒所宗議論風采中外推伏先帝置之經

帷複門掌於命書嘉謀屢吾於膝前善政已施於京劇兼是數器可謂大臣惟爾
一門公卿三朝侍從久宜登於近用尚有避於當塗况朕方以至公待人不少疑群
下豈以弟兄之任事而廢朝廷之權才矧在仁祖之時已格親嫌之制臺端之拜
無以易卿是用輟三學士之清班委中執法之要地爾其深體至意言念匪躬無
自拘於細文亟往踐於厥位肅正朝案敦厚時風矧觀猷為以輔台德可

尚書刑部郎中判三司都理欠憑由司秦玠可兵部郎中

勅夫考功課吏之法雖不足以待非常之人然居官幹職者歲久而不遷則不免
夫賢愚同滯之累議年進秩其可闕乎以爾具官某識用純明姿韻恬曠奉使稱
最治郡有聲正籍郎臺久擅宿官之效贊煩計部薦推應務之才姑閱吏勞稍陞
班等七兵華序寶冠右曹三使別司尚仍故守毋謂次遷之薄足為潛漸之榮勉
務欽承式副登擢可

尚書屯田郎中諸王宮記室葉紆可都官郎中

勅具官某迺者參擇宿儒為僚宮郎使以經藝諭吾宗親爾以學術之該通從邁
臣之保任始專講勸復王文書勤且歷年謹於率職攬攸司之上課在恩格以應
遷即其郎闈陞以班等茂對甄褒之命益思訓導之方且俾藩侯樂於為善繫爾

之能事也可不勉哉可

王說可左衛將軍駙馬都尉

勅王姬下嫁詩美車服之隆主婿奉朝唐增階品之貴矧惟先帝之子已正藩侯之儀庶求士倫克對嘉禮以爾具官某出於華胄茂乃素風蚤服習於詩書喜親近於儒雅藹然令器見推舊門是用擢於環列之班參彼副車之職台司視秩憲坐兼榮用光選尚之恩并示褒優之命噫連姻帝室接武外朝寵冠一時望高三尉保其祿位當務於矜修久而室家更思於抑畏服我辭訓無忘夙宵可

權漢州團練推官充吳王宮教授姜潛可大理寺丞差遣如故

勅具官某先皇帝念宗室之衆多顧學校之廢缺並擇時彥以為教官宜有勸率之條俾專講習之益以爾潛高誼著於東國善誘聞於上庠選自成均置之國邸洎傳經而蒞職加閱歲之屢周教導有倫安恬可尚命遷丞於卿屬且旌善於藩僚爾其欽承訓我宗屬且無忘先帝之舉也

都官員外郎權發遣三官都磨勘司兼主轄支收拘收司公事杜訢可職方員外郎差遣如故

勅夫公卿子弟習聞朝廷之典故周知臺閣之儀範擢處要任必有能稱益有唐

之舊事也以爾具官某出於名門稔服忠教嘗主臺劾近更郡符號為廉平克紹前烈向用邇臣之薦超備司計之員析利既精議年且久姑緣考課之比稍進右曹之前爾其休承益思率厲大爾門構副子寵章可

屯田郎中李泉卿可都官郎中

勅具官某朕遠攬周漢上法祖宗緣考功課吏之程著議年增秩之令所以待有勞之士而嘉久職之人以爾生於德門仕以科選稔聞吏治之譽方貳皇華之行積有年庸應我恩格矧累更於郎列復進秩於中都雖曰汎濫且疇善最尚仍煩使之舊益懋遠圖之休可

職方員外郎陳傳可屯田郎中虞部員外郎孫昱可比部員外郎

勅具官某等考陟之典尚矣自有虞以來未之或廢蓋疇能比吏勸功賞善有國之法不可缺焉以爾等委質策名居官任職民政有拊循之效郡網藉闕決之明稽閱四期嘉事勞之可錄進班一等亦酬勸之所存服我恩榮終期報稱可

都官員外郎新差通判南安軍劉炳可職方員外郎差遣如故

勅具官某夫山澤之禁所以佐助大農通貨豐財待是而出以爾朝案之望幹器有聞頃仕嶠南專司地寶能督州人之役用資園府之供績效甚明賞格斯在叙

進省曹之秩倘仍倖乘之行祇服恩榮勉勤職守可

虞部員外郎崔復可比部員外郎國子博士徐李舜元可竝虞部員外郎勅具官某夫考功課吏之法雖不足以待非常之人然士之懷能抱器雜進有司不有甄陞何用勸善以爾淹厯朝序稔更歲成於法當遷進官有等爾其體我恩意勤宣政事倘素蘊於才用宜勉力於施為毋曰汎濫而薄後最可

殿中丞致仕許弼可虞部員外郎致仕

勅具官某朝廷推慶賜之澤而不遺退休之人者所以旌尚止足而示寵高年也以爾早階仕綴得謝盛辰兩逢優渥之行未逮叙遷之比特緣往需躋進華階南宮右曹俾榮鄉閭爾其祇率益務保頤可

殿中丞賈忱可國子博士守衛尉寺丞侯可守大理寺丞

勅具官某廉能之邈早列於仕階撫字之求方紓於邑綬屬攸同之比課謂滿歲以應條進以一官甄其累效勉思勤儆往服恩榮可

大理寺丞晏祇德可右贊善大夫

勅具官某爾以丞相子仕隸京師能持謹循保守門法試以譏征之局頗彰幹辦之稱克道過尤有足嘉尚攬攸司之會課屬累久之當遷進陟春坊之僚使通朝

著之藉其思自勉益振緒風可

衛尉寺丞劉士劭可大理寺丞

勅具官某夫任職四歲有勤最而無悔尤不有遷叙則士之沈滯者眾矣以爾為丞卿寺厯試吏條攸司類能加秩有等其進理官之屬益思政治之宜可

前權知雲安軍判官馮越石前華州下都縣令張果之可並著作佐郎集慶軍節度推官前知磁州文城縣彭天麟可大理寺丞

勅具官某等士之由選調而陞京師者始用外官之保任加復有司之視成最狀上聞便廷臨引賞相其質數納以言然後命之良亦艱矣惟爾閱閱之茂咸應斯格有如辭章之美並由科級而仕擢以臺秩俾為王官漸階通顯之塗益慎進趨之守可

袁州分宜縣主簿前虔州受納板木場兼監排岸司劉最淮南節度推官前知鄆州中都縣事王仲安可並大理寺丞劍南西川節度推官前知梁山軍梁山縣事趙清可著作佐郎

勅具官某等或決科從仕或延賞入官並有廉能之資綿更縣邑之課臺章言狀銓筦條勞辨職者敏幹可稱字氏者拊循著效用擢京司之列茲為貴仕之階勉

思後勤勿渝素守可

前建州建安縣主簿監南劍州石牌場郭綱可大理寺丞

勅具官某國家謹山澤之禁非專利公上抑亦止民爭端官或有勞賞亦用勸以爾詞科進擢吏調淹回以閩邑勾稽之員督州人物地之役五厯年稔倍登貨程持遷荆棘之聯益示賞條之信爾其欽率思稱恩榮可

曹州南華縣尉王洎可太常寺奉禮郎

勅具官某朕以東畿積寇多出曹南故嚴設捕格之科以除生聚之患以爾得調銓筦往專尉循能奮勇謀悉擒兇黨擢爾京司之秩欲示信賞之行其益祇欽以對光渥可

常州無錫縣尉扈大亮可杭州餘杭縣令

勅具官某夫蒞蒲不戢則閭里靡寧賞典不行則做勸安在以爾調名銓筦為吏江湖謹於尉循號有方略屬彼寇數之黨肆為戕賊之謀一舉成擒群凶就戮嘉其善職之效寵以長人之官其勉懋於遠圖善撫綏於美俗副我甄擢無忘瘁勤可
皇叔前右監門衛大將軍克眷皇叔前右監門率府率克迓克慕皇兄前右

武衛大將軍榮州團練使仲論可並舊官服闋

勅具官某孝子念親情何以極惟三年之中制蓋天下之通喪眷我近宗動必由禮既畢居廬之慕宜還拱著之榮以爾慶行皇叔位通閭籍向緣銜恤久去辨朝閱寒暑之再離屬縞纈之云釋俾仍舊次庸示新恩勉悖信厚之風茂對休嘉之命可

前左藏庫副使曹誦西京左藏庫副使曹識可並舊官服闋

勅具官某天下無事兵革不試仕武武者咸得喪親以禮所以盡人子孝愛之情也以爾生於慶門早服義訓銜恤去位釋禫從公斯得孝忠之全宜還位著之列欽承新渥益勵後圖可

文思副使胡拱可左藏庫副使

勅具官某朕以累朝陵邑邈在澗瀍竝建官司典領封域爾向由內使祇事真園職為寢郎累更歲稔朝夕起居之奉無曠爾勞春秋薦告之儀亦叅厥守比代還而言狀嘉往效之良勤稍逸主帑之聯茲謂疇庸之命往承優渥益務欽修可

文思副使李惟忠可左藏庫副使西京左藏庫副使蘇信可文思副使供備

庫副使李惟清可西京左藏庫副使

勅具官某等內朝諸司參設使介所以待材武之士為帥領之基惟謀勇兼資乃

副超擢而課最應格亦得稍逸爾等勤能守官才任禦侮積日累久之課既應陟書恩階加等之榮寔居前列宜益圖於方略且無廢於事勞服我訓言以永終譽可左藏庫副使曹繼明可供備庫使西京左藏庫使雍規可文思使內殿崇班閣門祇候王文郁可內殿承制依舊閣門祇候內殿崇班韓見素可內殿承制勅具官某夫仕者久而不遷則才愚同滯進而以其效則流品弗甄今有司所以限年而校功循階而進秩者由此道也爾以材武擢於治朝內外煩使之勞訖無曠事歲月薦更之比已應陟書稍陞等於官聯且驍庸於閑閱往承新渥無怠後勤可

前文思副使衛克明可舊官服闋

勅具官某列職禁庭早擅勤恪之裕服喪墜室已終縞禫之期宜釋素冠超還舊著內司之介班等惟優勉遵移孝之方無怠首公之志可

西京左藏庫副使蔚世長劉輔可並文思副使

勅具官某內朝諸司並置使介所以視典領之閑劇為遷次之等差惟其職儀亦號通顯以爾任以才武能輯吏勤陞諸使聯薦更歲律齋閱來上有勞當遷稍增

陞級之榮庸示甄疇之渥承茲寵典厲乃公忠可

供備庫副使宋惟滢可西京左藏庫副使

勅具官某朕所以屢戒邊疆之臣不使生事却封者誠欲慰安吾民綏靖殊俗也爾向以廷中之籍出監煇外之兵厯稔三周善撫師衆外虞無警成效可嘉俾遞進於使聯示不私於賞格往服休命更勵後勤可

前內殿崇班康禹可舊官服闋

勅具官某任繇武弁服在朝行屬時偃兵靡事任革遼家艱而銜恤遵禮式以行喪歲月其周縞禫云釋宜起選於舊次當益念於教忠祇服訓言勉勤職業可

內殿承制王懷淳司允可竝供備庫副使

勅具官某等武爵之選籍隸於樞府者是為朝班由此而升諸司者又為優選雖議年而進秩亦寓令於擢才爾等首適逢時官亦久次應是寵格叙躋使聯蒞事局者宜勵於廉勤護師屯者益思於訓練祇服休命勉圖後功可

右屯衛將軍致仕徐用文可右武衛將軍致仕

勅具官某朕初嗣鴻業大賚四方首覃慶恩靡限遐邇惟彼引年之類例加增秩之榮以爾給事禁庭夙推勤愿退居近甸克享壽康宜沾渙澤之優稍進衛環之

列祇服休寵益保餘齡可

內殿承旨郭昭晦可供備庫副使

勅具官某夫武爵之設所以待材勇之人方無事時士特以積日而進取然總戎幹邊皆由此出授任之際良亦難矣以爾克有幹力嘗試事勞較其年勤甫應遷格進陞內使之貳漸履華塗之階無以易進而自安當念遠謀之可致斯謂勤獎爾其欽承可

內殿崇班王世安可內殿承制

勅具官某夫考課之法議年有等竝甄闕閱之最非有文武之殊以爾早用材謀服勤官次淹厯已久廉能可稱且緣計最之程進陞班制之列褒遷之寵勉懋其承可

東頭供奉官陳永齡可內殿承制

勅具官某南海百貨之所叢四方商賈之駢集惟其繁富之會是亦剽盜之招以爾官守遐厥職在循警能殄除於寇黨且安慰於民居成效既然推恩何悵往服內朝之籍益思方略之圖可

東頭供奉官趙滢孫穆之可並內殿崇班

勅具官某等仕之隸三班者其任使特為冗辱而遞次又復稽緩然由此而陞內著者益積日已久而陳力且多矣以爾服勤吏役能寡過尤應課攸司亦在最等命通聯於殿籍斯漸履於榮階宜益於修以稱甄錄可

東頭供奉官趙定可率府率致仕

勅具官某夫仕貴量力而進欲知止此士大夫之所美也爾居武弁能蹈斯言壯而從官老而謝事是可嘉尚所宜顯褒擢於儲禁之班俾從家居之秩保爾暮齒承茲寵榮可

西官供奉官郭右之可右清道率府率致仕左侍禁李昭懿可左清道率府

副率致仕

勅具官某早從職守充集吏勞洎列庭班亦更事任自言耄及願獲歸休宜擢進於儲僚俾退居於里閑承茲佚老之命慰爾暮塗之榮可

右侍禁呂嬰可左清道率府副率致仕

勅具官某爾以州郡之課得列仕階以歲月之勞屢陞班等自言齒耄願謝官榮特遷官率之聯俾遂家居之佚可

守少府監致仕王山民男漸可守將作監主簿

勅某男某乃父仕宦三品年至告歸閱其久勤延以世祿以爾早聞家訓克紹素風擢真京司俾階榮路往承新渥益懋爾思可

翰林醫學富州龍平縣主簿潘務本可少府監主簿餘如故

勅具官某爾以方技之能為王官之守向逢霈澤方役遐陬歲滿言歸慶條具在擢預京司之秩且甄執藝之勤服我休恩益精素業可

左諫議大夫知瀛州李肅之奏醫人孔世卿可試國子四門助教不理逸限勅具官某方技專門診治有法給事帥即服勤累年屬覽奏封之陳且接近侍之比寵以一命足為爾榮可

秦州東路弓門寨界蕃巡檢副都軍主張朴令狐可銀酒監武充本族都軍主原州之安寨白家族都虞候薛乞可銀酒監武充本族副軍主

勅某職於邊候號有才謀俾式道於諸戎且無虞於外境藩臣列奏寵命惟行進膺帥領之榮深盡封陞之效可

同安裔孫萬靈錫經

逢年舜畊

晉爵耀庭

允恭子敬全枚字

蘇魏公文集卷三十二

宋太子太保右僕射同中書門下平章事司空魏國公蘇頌撰

逢年舜畊

裔孫萬靈錫經重棊

外制

晉爵耀庭

右諫議大夫知制誥宋敏求依所乞落知制誥守本官差遣如故

勅夫代言詞禁抗論諫垣皆侍從之榮塗本才髦之迭處苟堅辭職之請靡帶遮直之勤特徇雅懷俾原近秩以爾具官某學窮墳素世掌絲綸三朝擅文史之華兩掖著猷為之美朝廷命令久預於演裁臺閣規撫兼推於練達忽告眊昏之苦願還翰墨之司再控封章備形懇至姑就七臣之列仍專眾職之臨噫去劇即閑既從於爾欲待賢優禮當體於予表勉思裨政之謨式副疇咨之渥可

權三司戶部判官尚書司勳員外郎李立之可主客郎中

勅具官某今之由尚書郎為三司佐屬其選重矣非有積累之資明著之效則豈稱其官使哉以爾清白承家廉方為吏名登華省治有顯聞曩丞水官能勤於障導移職計部善析於貨財課在有司法當遷秩擢正客曹之列仍參戶版之員膺

茲茂恩益念成效可

左驥驥使劉斌可皇城使

勅具官某諸司置使秩有等差而皇城為東班之首非夫歷仕綿久材用章著安能陟級而致榮階以爾沉敏之資幹力之效擢於勇爵實在朝聯累歲有勞中樞效課當敘遷於官列俾陞冠於使華祇膺優異之恩益念始終之節可

皇姪千牛衛將軍令諤可右監門衛大將軍

勅羣臣考陟之法近則四歲遠或六年輒遷一官是謂大比至於宗室則以十歲為定蓋起歷階序不與外庭比故不得不積其歲月而養成其材質也以爾具官某承襲慶美本乎天源生知孝恭長受寵祿能循保氏之教不忘為善之樂今宗正言爾服官滿歲由環衛而陞大將可謂峻遠矣以命爾抑用前詔爾其夙夜匪懈內奉朝請外遵家政則可以遠於悔尤而守其祿位也可

尚書祠部員外郎充秘閣校理鄭雍可度支員外郎

勅具官某秘書圖籍之府非博學洽聞之才未嘗預校文之列郎官清要之司非通明敏識之士未嘗在承務之員二者兼榮斯謂優異以爾詞科甲選治狀最稱擢實書林薦游華省有司上累年之課官闕稔聞南宮敘左曹之聯度支尤貴用

增爾秩俾疇厥勤更思善職之謀以副類能之舉可

鄉貢進士葉祖洽可大理評事簽書奉國軍節度判官廳公事

勅某朕遵累聖之成謀復三年之選士俯臨便坐親策諸生爰擢敏才真之上第以爾士鄉特起貢部陞名方領矩步以來庭大對危言而應問嘉乃博通之習用推優異之恩棘寺評刑超登於仕藉海藩佐幕往蒞於政經無忘學古之規式副優儒之舉可

太常博士充秘閣校理安燾可祠部員外郎

勅具官某夫校文天祿方登博洽之才承務南宮是為清要之選爰疇善職敘進榮班以爾典學清修決科高妙試之藩府則外臺稱從事之賢擢於奉常則有司言禮官之最因第勞於歲課宜陞案於冰廳益思講繹之勤用副咨詢之舉可

駕部員外郎田璋等改官

勅某國朝之制自諸司四品暨尚書郎卿寺丞屬皆委之審官考核其賢否雖羣萃而序遷士常患其雜選然勞陞而過黜時亦以為遴選與其進者厥惟艱哉惟爾之材能強辨有司銓敘之蓋已久矣姑用四載之最稍擢二官之榮勉收後勤副我明陟可

都官員外郎新差權發遣江南西路提點諸軍州刑獄公事張頤可職方員外郎餘如故

勅某朕閱朝士之籍擇其有聞於時者試之以煩劇之務內則臺省之僚列外則憲漕之事權績用既彰褒擢何吝以爾文雅沉厚士林所稱幹辦精明吏課連最方且委以一道案讞之重而又及乎四載計比之期宜增秩於清郎示甄勞於久次若其奉使之稱職治獄之平反則朝有顯庸豈限常格爾其勉懋服我疇咨可屯田郎中蘇泳等改官

勅具官某尚書諸郎其品第五惟古號為清要在今得以敘遷稽其職儀是謂通顯以爾吏資官闕計比惟優朝著省闈踐歷滋久擢進烏星之位漸陞鸞黨之階往其欽承無怠守職可

都官郎中王力可職方郎中

勅某夫承務南宮出使近服皆朝廷之優選而仕進之榮途屬奏歲勞用推恩陟以爾士科擢秀郎省馳聲試以治煩載嘉政事之敏委之督漕益懋將輸之程始循校課之常稍進掌圖之秩宜收後最以副甄揚可

比部員外郎刁綬俞士龍可並駕部員外郎

勅具官某尚書郎官皆有副貳視其曹務之閑劇以為爵取之等差限年而遷蓋有恩格以爾能勤職業休有幹稱履歷周行綿更歲次始由吏課之最敘進省闈之聯往承渥恩益勵素守可

都官員外郎充廣陵郡王申王院教授郭原中可職方員外郎餘如故

勅具官某南宮為郎其選尤美有司校課限年乃遷自非積閱之優靡與類能之擢以爾清門襲美仕歷朝閭近著薦才職居中郎頗聞善誨之益且懋宿官之勞宜即省闈進榮班等祇欽甄序之渥無怠講論之功可

虞部員外郎程莊可比部員外郎

勅某尚書員外郎自唐以來號為清要今雖不涖省事顧其榮秩不減平時考課而遷是曰優命以爾吏資之敏久試外官歲月之勞薦登最格矧已更於華著宜叙進於通班祇膺加等之恩益念匪躬之節可

大理評事章望之可光祿寺丞致仕

勅具官某通古今之學擅體要之文命屈當年仕沈下列志不櫻於簪組心自適於江湖恩命屢頒輒遜辭於榮進懇誠再露祈退就於燕休守臣為言高風可尚優進膳丞之秩俾從鄉閭之居祇欽寵章益保冲粹可

前守惠州歸善縣主簿充國子監直講盧伺可衛尉寺丞

勅具官某爾以經藝名家禮闈奏技勾稽南服外臺稱其廉平講訓上庠諸生服其行誼姑用年勤之久敘陞卿屬之華尚倚師儒使留黌序其益思於循誘冀有助於化成祇欽寵章克終譽聞可

試秘書省校書郎和州防禦推官充國子監直講崔公度可試大理評事充彰德軍節度推官

勅具官某博學多聞見推士論韜光蘊行自樂邱園向從特起之求且預上庠之召屬辭親養靡應命書逮喪紀之既終閱薦章之交至惟其才諳宜有甄獲俾從事於方州矧觀能於幕畫勉思致用副我擢賢可

大理寺丞文大同可右贊善大夫

勅某今夫仕者既通籍於朝闈東宮與上臺班品雖異而推進之遞選次序實均以爾席慶高門隸官卿寺分釐外局休有能聲比最攸司甫應恩格擢聯宮贊之秩漸階省闈之榮益懋來勤佇收遠績可

右贊善大夫朱溫其可殿中丞

勅具官某天下之獄覆於刑曹設官置參其責均重閱茲校課之美宜有旌能之

恩以爾仕以經明進維朝定再膺詳獻之薦屢告平反之言姑用吏勞擢登省
宜益思於明慎佇顯副於甄揚可

奏舉人試大理評事前權信州軍事推官呂昌壽等改官

勅某今之銓選之法至為詳密以歲課校其勞動以薦章視其操守二者備矣然後
敘遷美秩榮資由此階漸惟爾闕閣咸應於茲俾陟京臺之聯益圖吏治之效可

皇姪前金紫光祿大夫右監門率府率士景可舊官服闋

勅執親之喪鉅創何已順禮之變再期則除臯予近宗動稟成訓屬居廬之終制
當引籍以承恩以爾具官某茂公族之華陟朝闈之序哀麻去位既畢於哀情籍
敘還臺宜陞於顯列復踐儲坊之秩入榮拱著之趨勉荷徽章策勩素守可

皇后生日奏親堂叔國子博士向綽可檢校工部尚書充內園使

勅具官某內朝諸司並置使領叅擇才武入備禁扃由文吏而對遷非親勲而莫
允矧中宮之尊黨援誕日之慶條式推渙恩抑有舊比以爾綽席公卿之餘緒仕
闈著之通班夙富吏資善守門法屢試治煩之務見推幹裕之能陞諸使聯示以
優寵非特私於近戚蓋亦用乎美才勉勤功名乃副甄擢可

內園使知欽州石鑑可南作坊使令再任六宅使知邕州陶弼可左驥驥使

令再任

勅嶠南諸州溢於夷境者邕為會府而欽當要衝帥府之臣其選差重以爾具官陶弼握武緣之節馭邊有方以爾具官石鑑析羅山之符撫俗尤善而皆文敏自喜才資並優眷彼吏民方安於政迹表其治行咸進於使聯且重留於舊邦俾克終於美課究其綏懷之畧用光獎擢之恩毋憚遠勤遂無前績可

六宅副使張恩可內藏庫副使

勅具官某內司列使之榮並置副介增秩敘遷之法咸有等差爰擇武材庸備官制以爾策名勇爵服采禁廷頗章幹職之勤且懋歷年之最宜疇美課躋進榮資往欽甄異之恩益盡忠勞之報可

文思副使劉昌孫可左驍衛將軍致仕

勅具官某夫仕或為祿貴夫逮親此士大夫之所美也爾居武弁能蹈斯言以偏堂之髦年祈謝事而就養是可嘉尚所宜顯褒擢於環衛之班俾從家居之佚遂爾素志嘉茲寵榮可

內殿承制樊德成可左屯衛將軍致仕

勅具官某傳曰陳力就列不能者止此為臣之大方也爾早任武階綿更外使自

陳力疾之苦難效當官之勞願去班聯良嘉止足寵以環宮之衛俾安里閭之居
祇服恩榮遂諧頤適可

殿中省尚藥奉御直翰林醫官院張士禹可殿中省尚藥奉御充翰林醫官
副使

勅具官某周官醫師掌醫之政令以事制祿十全為上視功進等厥惟舊哉以爾
執技精通居官勤恪擢在尚方之直榮叅內著之朝屬我諸姑近嬰綿痼言爾診
調之效願疇處齊之良陞諸使聯用獎能事宜悉心於遠術思報効於殊恩可

內殿崇班趙永圖可舊官服闋

勅具官某爾列職禁庭蚤擅恪勤之裕服喪墜室已終編禫之期宜釋素冠起還
舊著內朝之籍班等惟優勉遵移孝之方無怠首公之志可

奏舉人前大名府留守推官試大理評事謝宗孟等改著作佐郎大理寺丞
勅具官某等秘書大理之屬官前世為文章法律之選今銓筦之士考課來上視
其資歷得以叙遷爾等咸以為吏之勞從外臺之薦俾之佐著作丞卿寺所以廣
擢材之路也膺茲並命各念首公可

奏舉人前京兆府乾祐縣令趙全等改著作

勅具官某麟臺著作古稱文雅之選天官考課今為進擢之階以爾詞學決科廉勤在事校其年最甫應陟書俾遷京省之聯用獎吏能之美玉欽恩典益屬操修可
奏舉人試秘書省校書郎前守宣州司理叅軍王醇可著作佐郎

勅具官某有唐吏部以四才三實選拔賢能今之銓衡略用此制而又峻以考格責之薦章一不應條未嘗進擢惟爾之器質才諳有司校之詳矣廉明勤辨外臺稱之備矣引對便坐審察其才陞列秘邱之聯將觀幹劇之用益懋乃事副茲寵惠可

奏舉人前鳳州梁泉縣令張延年等改官

勅具官某中銓考課之法以才實為差外臺薦籍之章以幹廉為重進人之路辨等尤難以爾夙富吏資久仕州縣校其年最應乃陟書敘遷卿屬之華以顯宿官之效服我休寵無忘後勤可

試秘書省校書郎守河南府法曹叅軍充魯王宮小學教授王祁可大理寺丞

勅具官某朕惟宗室子孫之眾欲其通知於道藝故擇儒雅之士為之講導以輔成其性質爾以經行修明來預茲選服職累歲其勤至矣擢陞卿寺之屬仍真宮官之員茂對殊私益思恩訓可

奏舉人前彬州高亭縣令邢構等改官

勅某令夫天下郡縣之廣吏員之衆非責之薦者則才勞之士何由而上達耶以爾蚤從銓集外有吏能善狀可稱交章狎至宜甄久職之效擢列上臺之官祇服恩榮采勤治績可

前定州觀察推官常宗仁可衛尉寺丞

勅某朕念夫銓選之士敘進維艱親程其能務收厥善雖有細故而不棄遺爾歷仕有年書考十五外官稱薦其勞可嘉特示甄陞寘之京寺膺茲優異之典無懈終始之勤可

秘書省校書郎守唐州泌陽縣令朱絃可大理寺丞餘如故

勅某夫農田者生民之本也川澤者農田之資也而當官之人常患不能為之勸導使民棄本而趨末者衆矣爾居邑令能志於茲修復故渠為利旁境計臣言狀請躋以官因擢九卿之丞俾仍百里之宰往膺明命善撫吾民益懋前勞乃稱甄寵可

蕃落軍都指揮使馬忠等換內殿承制

勅某以拳勇聞於邊疆以勤良備於軍校為種酋之所嚮嘉技擊之尤精帥路為

言便庭親試載閱武才之敏擢躋殿著之華閣籍聯榮恩章不次當益圖於忠蓋在勉懋於勲庸可

西頭供奉官梁錢可右清道率府副率致仕

勅某七十致仕士之常也爾年未至而願歸休嘉其退尚之誠宜有褒遷之渥儲坊散秩俾遂家居祇服恩章往安閭里可

右侍禁于用和可左清道率府副率致仕

勅某早以吏勤擢陞班列逮茲齒髦願謝官聯良嘉知止之心俾遂歸休之佚儲坊美秩里閑安居住祇服於明恩足為榮於晚節可

右侍禁郭懷慶可右清道率府副率致仕

勅具官某七十致仕禮經之常也爾不待年至以疾自言閔筋力之既衰豈簪裳之可強陞以東儲之秩俾為居里之榮祇服私恩足慰遲暮可

右僕射兼門下侍郎平章事曾公亮奏醫人謝維可試國子四門助教不理

選限

勅某爾傳習上池之技善識五藥之宜嘉勤事於相門尚未霑於仕版奏章來暨恩典有常往膺一命之榮策盡十全之效可

楚國大長公主過南郊奏駙馬都尉李瑋祖宅門客廣文館進士許槩可試
將作監主簿不理選限

勅具官某蚤隸上庠薦游主第屬邑司之有請援郊慶之推恩言爾多文且祈篋
仕俾膺試秩之命用醕肄業之勤祇服寵私勿忘修飭可

太子少師致仕趙槩奏醫人張琬可試國子四門助教不理選限

勅某習岐黃之論游卿輔之門術業甚精診治多應特徇舊臣之請用推試秩之
恩祇服殊私益勤所學可

光祿卿潘珍遺表男綬可試秘書郎

勅某九卿之子例應試秩起家屬乃父之云亡抗遺章而來上閱其陳力之久宜
有恤後之恩擢爾仕塗俾延世祿當益思於負荷且無忝於榮名可

兵部員外郎充寶文閣待制知相州傅卞遺表男回次男同可並守將作監

主簿令持服

勅某近著之臣忽傷於徂謝恤終之典宜異於常規屬覽遺章祈爾世祿命擢陞
於京寺俾不墜於家聲祇服優恩勉思負荷可

追官勅停人鄭叔熊可試國子四門助教不理選限

勅某蚤用近臣之薦擢聯試秩之榮坐法奪官援恩自理嘉素專於術學俾牽敘於上庠祇率恩章益思修省可

太常少卿致仕謝檢孫延年可試監主簿

勅某近制尚書外郎謝事得官一子以榮其歸所以嘉士大夫進退之美也維乃祖父仕列亞卿解紱引年祈恩裕嗣假爾一命慰其晚年往膺試秩之榮益念克家之訓可

守濮州文學尹處晦可曹州文學

勅某頃列仕階尋貽吏議廢官滋久援歸自陳矧已寘於散曹宜稍遷於近郡益思循省以荷甄收可

翰林醫學守應州金城縣主簿溫果母梁氏可特封長壽縣太君

勅具官某母某氏爾子以方枝名家禁庭待詔喜有逮親之祿願移遷秩之恩眷乃高年遂其私欲特疏榮於湯邑俾增耀於鄉閭膺茲寵光足勸孝養可

都水監針料後行浦士隆可孟州司馬

勅具官某給事上臺歷年滋久苦於羸弱願遂休閑易以州佐之聯俾從家居之佚被茲榮命足慰歸塗可

故知溪洞新遠州軍州事思忠利長男洪祐之可依前知溪洞新遠州軍州事
勅某世居邊徼夙効忠勤屬乃父之云亡當襲官而繼美爰推恩渥俾守封疆其
善撫於裔夷思克承於門緒欽膺明命益盡丹誠可

溪洞高州四甲巡檢田洪祐弟洪保承兄官

勅某乃父蚤著忠勞每茲淪謝爾之伯氏已襲故封遞遷厥官俾慰遐裔爾其善
承世美思撫邊民無忘循警之勤乃稱恩榮之美可

麟州兀羅族子弟屈德可銀酒監武充本族副都軍主

勅某代居邊陲號有才勇承父兄之餘緒為種族之推先命傳襲於世資俾統綏
於壯籍通階試秩式示朝章膺茲渙恩無怠乃事可

蘇魏公文集卷三十三

宋太子太保右僕射同中書門下平章事司空魏國公蘇頌撰

逢年

裔孫萬靈重棊

外制

耀庭

提點陝府西路諸州刑獄公事司封員外郎趙瞻可祠部郎中

勅承務中臺左曹謂之清要觀風外服右陝當其會衝惟時通籍之良方重獄刑之寄稽其治課應我陟書以爾具官某博通古今多識治要早預法冠之選往分郡組之行稔其休聲擢以方任案條察吏有能臣之風閱歲校勞居奉使之最進列冰廳之秩益增星節之華宜勉懋於事為副疇咨於近劇可

虞部員外郎曾孝寬可比部員外郎

勅具官某古之仕臺閣者多用公卿之世以其習熟典章可任以事隨資敘進式佇甄陞以爾士操清修學術詳敏繼承門法厥問甚休副郎省六聯之華結天官四載之課姑循常格擢列近曹惟勉懋於官箴用顯揚於世美可

三司度支判官尚書刑部郎中充集賢校理王瓘可尚書兵部郎中依前集

賢校理充三司度支判官羣牧判官尚書比部郎中王誨可尚書司勳郎中依前羣牧判官

勅夫考功黜陟之法自有虞以來未之或廢我朝稽古其令甚明雖職列臺閣之華任登要近之地必由校課然後議遷以爾具官王瑾文敏學優才通用博服勤鉛槧之業振務計財之繁以爾具官王誨仕富吏資行循家法稔譽郊畿之政贊司民牧之良而皆久次郎臺薦登最格稽其功狀應進上階武部冠於右曹勲書次於大選用疇爾善各俾序陞若其治迹之殊尤材資之美茂則朕所考察不在有司之比往服休命爾其勉哉可

尚書比部郎中馮博雅可如京使惠州刺史

勅具官某國家設官之制畧擬唐規列使之名近對郎務仕者更踐惟才所宜別兼領於郡章示優隆於武爵自非勲戚曷允咨俞以爾早服闋臺夙推器幹襲相門之餘緒連宗邸之外姻間覽奏封之陳載嘉闕閱之美俾從華省易授內司掌庾京都實超於資等析符善壤益重於聯班佩服恩褒之華勉圖方畧之上可

前秘書丞充集賢校理孫洙等可並舊官服闋

勅具官某夫服喪去位人子之私恩也脫衰還朝人臣之公義也故進退不踰其

禮則忠孝可以兩全以爾仕以才能籍在臺閩遭罹艱疾甫畢禫除姑循常經起仍舊著益思所以揚名顯親之效在勉懋於公家而已可

尚書比部郎中范仰之可駕部郎中

勅具官某審官考課之法以四歲為限南宮遷秩之等有六行之差旌擢吏勞宜優寵典以爾材資敏茂治狀詳明為郎有年奏最應格進列右曹之上益光華省之游欽對明恩更圖遠績可

駕部員外郎李安道等改官

勅具官某等朕命有司考羣吏之治限年而上課隨資而敘進雖令有定著而思無汎及允如遷格茲謂宿官以爾等或仕厯省闈或籍通閩閩出幹眾務入奉外朝稱最及期稽功斯善增秩一等姑用前規若乃才譽彰聞績效明白則懋官懋賞豈限常資爾等勉之副我明陟可

都官員外郎仇著等改官

勅具官某等尚書郎九卿丞屬皆外庭美選通籍之士得以次遷所以辨才能而旌吏闕也以爾等材力之敏試於治煩操履之修行而寡過分列省寺外更事勞有司議年既成積累之效隨茲進秩咸增班爵之榮祇服恩華勉思忠報可

國子博士高保衡等改官

勅具官某吏治有勞法當甄獎天官覆實恩有次遷爰錄顯庸特推茂渥以爾夙勤士操進列朝闈幹職不愆奏功斯善錄其四載之課擢以一官之榮益務遠圖不欽厚獎可

西上閣門使李評可東上閣門使

勅具官某中閤典謁列使橫陟降殿導揚詞命非素推於詳練固靡副於咨詢以爾世服忠純材資敏達向擢聯於上閣叅掌選於西銓朝廷之儀頗聞事舉閱閱之課復用最陞特甄累歲之勤就陟東藩之秩宜益圖於遠績期報稱於異恩可
皇兄前右武衛大將軍春州刺史仲虺可舊官服闋

勅具官某三年之喪稱情而立文日月既終哀麻必釋蓋天下之通誼也爾以宗室之秀服闈朝之聯向罹親憂銜恤在疚既畢禫織之制宜還簪紱之榮欲忠孝之兩全在始終而一節往祇厥位當體訓言可

皇姪前右千牛衛將軍令羽可舊官服闋

勅子之於親也有鞠育之恩顧復之慈三年之喪未足以報其厚德然聖人稱情而立文不可多寡故天下共之以爾具官某宗室之近支臺闈之顯列遭罹不幸

棄失所天服衰而居倚盧克遵禮式鑽燧而更異火甫畢禫除宜還定著之聯入奉內朝之謁無忘信厚茲謂顯揚可

仁壽郡君張氏可才人

勅嬪婦之列蓋掌帥於宮庭才美之名實優隆於位號載嘉內治之助特厚言綸之頒某氏體閑淑之令姿稟肅雍之懿範自參承於御斂嘗進躡於恩封而謹職中闈顧德言之並茂增華近序介祥祉以尤殊宜加印綬之榮用光圖史之鑒惟靜專所以安寵數惟婉約所以副褒章服我訓辭無忘欽率可

左千牛衛大將軍羅榮可依前官充絳州團練使

勅漢之執金唐之諸衛今雖處於閑秩然猶列於上班或兼方任之權益顯官儀之貴以爾具官某早登勇爵嘗典五符因齒力之向衰擢禁環而甚寵仍司戎仗獲就燕安宜優異於久勤俾復陞於團練斯為厚渥足慰暮年尚殫夙夜之心以答始終之遇可

皇城使宜州團練使柳涉可左千牛衛大將軍宜州團練使

勅具官某國家待賢能之士恩禮甚厚方其壯盛則任以權劇而先責其實效及其衰耆則處之便安而俾遂乎休養以爾夙負材氣來任班列臨邊有綏禦之效

治郡得廉良之稱閱其暮齡宜有優禮特遷環衛之秩仍假州符之榮易事局於清閑示始終之殊遇體茲厚渥姑務燕怡可

秦國莊孝大長公主遺表長男供備庫副使李嗣徽可供備庫使

勅具官某朕悼睦懿親愴仁姑之早世周旋恤典鑒遺牘之所陳眷言世嗣之邁凶方倚居廬而茹痛特越從於朝序俾擢正於使名念往撫存宜體國章之厚慎終追遠益思家事之承祇服訓辭勉遵禮式可

如京副使兼閤門通事舍人王光祖可莊宅副使兼閤門通事舍人

勅具官某朕擇沈敏方重之臣委以邊畧庶幾安輯一道使不生事於疆外而爾光祖實應茲選涖事之始辨職惟勤入奏便朝講畫有素載嘉策慮之美特爾甄陞疇進使聯式優戎路惟爾世服忠義累更寄任宜益圖於遠績斯乃稱於寵章可
西京左藏庫副使程昉可莊宅副使

勅具官某夫服軒墀而列禁衛皆朕所信任之臣也則敘遷之法推恩固優以爾幹裕謹良擢侍近幄出護河役訖亦有勞校課滿年功狀應陟躡進使名之美仍參拱扈之榮祇欽寵章益念忠報可

左藏庫副使鄭惟勳等服闋

勅具官某早登勇爵列在閩朝俄服親喪甫終祥祭奉追書而來集還舊次以參
祭服右著之聯無忘厥守展四方之事佇集爾勞可

供備庫副使黃巽劉永清可並西京左藏庫副使

勅具官某列局京都分處衆務並置使介以擢羣材今雖無列職之煩抑亦有限年
之選向非能稱不在次遷以爾通籍右閩服勞王事出入著幹廉之效歲月成累
久之勤結課薦周進官有等欽膺褒顯之渥益念公忠之誠可

未復舊官供備庫副使張繼凝等復官

勅具官某爾向以武材擢在邊徼失於禦寇用是奪官屬需恩之溥加閔公坐之
滋久稍遷秩次進列通班不欽甄敘之恩無怠忠勞之報可

文思副使田守則可左驍衛將軍致仕

勅具官某任優而賦祿年至而謝事古今之通義也以爾材力素稱擢在班列更
慰中外頗亦有勞自言且衰願還所職既許之退宜優以恩躋遷環衛之資使為
鄉服之寵往祇榮渥益保暮齡可

殿中省尚藥奉御直翰林院蘇惟和可翰林醫官副使

勅具官某周禮醫師有稽功賦祿之等本朝官制有置使立貳之殊既彰厥能宜

進之職以爾通上池之技聯中省之班典領累年診治有效擢進內司之介用旌久次之勞益念精專乃副恩陟可

太子右清道率府率致仕張忠可落致仕依前官

勅具官某七十致仕大夫之禮也豈謂夫武力之士哉爾以才勇聞所至可紀引年當去大臣為言都城方藉於繕完祿秩固宜於優假特還儲率之秩俾幹留司之煩往服殊恩尚勤乃力可

內殿崇班閤門祇候趙璞可內殿承制依舊閤門祇候

勅具官某夫入贊上閤出乘塞垣皆武爵之美選也爾以殿著之秩兼領其任自非材資之敏曷膺職秩之優屬上年勤載嘉治狀姑循班級之次稍進官聯之榮尚綴近塗益思達業可

內殿崇班李舜卿可內殿承制

勅具官某爾通班內著之聯祇事平陽之館追惟懿主奄謝昭辰遺奏上聞言爾勤力宜特遷於朝秩俾仍幹於邑司祇膺優異之恩無怠始終之效可

內殿崇班張敏可左監門衛將軍致仕

勅具官某服武弁者以筋力為高而爾之齒耄矣豈任奔走之役閱其久勞宜有

安處俾易銜環之秩歸為里閭之榮祇欽茂恩益自休養可

大理寺丞張保微王慎儀等改官

勅具官某爾以名家子擢在京司能蹈世風不廢官守薦者稱其幹裕攸司上於年庸法有次遷班陞一等往服朝綸之寵益思門構之承可

大理評事李德芻可光祿寺丞

勅具官某考課之法豈所以待俊異之倫然官久不遷則能者何勸以爾文雅修絜善承世風仕於京司蔚有美稱姑用四載之陟稍進一官之榮益懋遠圖以光慶闕可

大理評事楊耆可衛尉寺丞

勅具官某爾延賞入官坐曹試吏能弗懈於王事既積稔於歲勞上課應條攸司言狀敘遷之典獎勸在焉斯漸履於榮階益服勤於治效可

前知涪州樂溫縣事鍾浚可秘書省著作佐郎

勅具官某考課之法不行久矣吏之能否何以甄明前詔有司復修舊典而爾之治狀實應新書遷佐秘邱俾偕榮路惟爾詞科之秀歷任有年膺茲渥恩必能勉懋以副朝廷責實之意也可

奏舉人前閬州錄事參軍霍亨等改官

勅具官某夫仕於州郡既擅幹廉之稱校於銓衡復成積累之課不有恩獎曷甄吏勤以爾士操甚修官闕無曠從外臺之尉薦副便坐之收敷擢聯京司俾漸榮路所宜欽率以服寵光可

奏舉人前權知建州節度推官孫宇等改官

勅具官某夫甄擇才能莫若觀詳試之效考察言行莫若責保任之人由此而陞得士為眾以爾歷官州縣亦既有年覆實銓衡咸應前格因唱名於便坐命遷秩於京司欽承渙恩勉盡勤恪可

奏舉人前陝州陝縣尉常景可光祿寺丞奏舉人前晉州趙城縣令安壽可
著作佐郎

勅具官某等郎內閣丞蘭臺遷佐皆京司之美官也由選部而陞者非詞學之科與公卿之世不得與焉以爾等仕於縣邑或令或尉皆有善狀稱於知已中銓考實便坐推恩各用爾資進增厥秩既蒙獎擢之命宜盡公忠之心可

奏舉人前權准康軍節度推官試秘書省校書郎許宗舉等改官

勅具官某等九卿之屬皆美官也秘書以待文雅之士大理以進詳明之才由銓

筮而敘遷蓋榮塗之階漸以爾等或詞中科級或仕起世資久從州縣之勞繼有知己之薦引對使坐擢聯上臺仍俾長民益思善俗可

延州甘泉縣令張圖可太子中允致仕

勅具官某今之仕於銓選而不虧廉守者其告歸也則以朝籍寵之所以嘉夫士操也以爾文中科選官為長民甫及始衰之期乃懷知止之尚陞秩儲禁增美鄉閭服我褒優之恩慰爾沖退之志可

登仕郎守祁州深澤縣令韓孝直可守河中府河西縣令

勅具官某捕盜之格殿賞尤嚴綏安里閭良藉幹畫爾頃尉畿甸能勤厥官寇攘就擒功最應令擢以大邑寵其前勞宜善撫於羣元思益圖於後效可

儒林郎行秀州華亭縣尉劉安世可守越州上虞縣令

勅具官某翦除盜賊肅清里閭尉事也爾隨牒遠方能勤厥職剋聚之黨一舉而擒錄其前勞易以邑令勉收撫字之最式矜甄拔之恩可

駕部郎中致仕趙宗閔男觀可試秘書省校書郎

勅具官某男某士大夫年至致其職事於上於是有賞延之澤以及其子孫古今之所同也爾父仕歷省郎引年得謝俾官一子以寵其歸爾勉承之無替厥服可

故恩州司理參軍王獎男觀可守鄆州須城縣主簿

勅某男某爾父頃掾清河沒於城守當推卹典以及其家而爾方稚年未任仕格遠茲有立可以入官因命舉於前恩俾勾稽於使邑所宜竭力以亢厥宗可

故給事中充天章閣待制王舉元遺表親孫王璞可將仕郎試將作監主簿勅某朕念彼帥臣奄違於明代恤其家事特厚於恩綸爾實裔孫早聞義訓特推試秩之命俾逮亢宗之榮善守世風無忘學古可

東頭供奉官王唐卿可內殿崇班

勅具官某仕無文武之異而以登朝為貴況通班殿著是曰華選以爾策名右列從事有年校其勤勞材力可見稽於令格遷擢攸宜進聯廷籍之榮深謹官箴之畏可

左侍禁趙昇可清道率府副率致仕

勅具官某爾以拳勇自奮擢真任聯體力未衰遽辭祿秩惟其知退之果宜有優遷之恩儲率榮資鄉閭歸佚膺茲褒渥遂爾素懷可

應天應進士陳宗望永寧軍明法劉堯可並遂州軍助教

勅某今夫布衣韋帶之士挾藝文而游場屋至老而無所成名是亦可矜矣屬逢

三歲之舉特推一命之恩用慰晚年足勸學者可

制置三司條例司奏潭州湘陰縣鄉貢進士李度可將仕郎潭州長史

勅某朕念夫服田疇之民多水旱之患嘗詔執事勸人興功爾為鄉儒有志於是倡率閭里繕完隄防卒化汙萊遂為膏壤覽使者之言狀命州佐以起家祇服殊恩更思來效可

軍員換諸司使副及崇班承制

勅某人等夫入奉宿衛出為廷臣蓋勇爵之甚高實公朝之慎選爾等擢於武旅號有材謀亦既程其器能是用陞於仕級寔服褒華之渥當懷奮勵之誠往圖後勤無怠素志可

軍都指揮使諸班都虞侯與除忠佐帶遙郡不帶遙郡

勅某人等軍師之長是皆材武之倫進退之間固有甄優之比第其功次需以寵章爾等典領和門周旋歲序宜易輿行之領往參軒陞之聯尚體恩榮無忘忠蓋可軍都指揮使諸班都虞侯與轉軍分帶遙郡或有遙郡

勅某人等師旅命帥所以壯營衛之嚴班爵有差所以示功庸之勸惟其遷次是曰寵甄爾等咸負壯圖久宣忠力才勞並茂賞擢兼優進加等級之榮無替夙宵

魚委之文集 卷三十一
之效可

廂都指揮使與落權正任

勅某人等夫武力之士內則為王之爪牙外則當國之藩衛雖序進之惟舊亦校勞而後遷爾等早以拳勇之名擢於拱扈之列備彰器幹善戢軍和積於歲勤應我勅典或進兵圍之貴或分使竹之權茲謂殊榮勿忘報稱可

廂都指揮使

勅某人等夫立乎三軍之中使士卒服習必自拊循之有素然後部勒之得宜用次以遷抑惟舊典爾等在事累久服勞可嘉式求壯籍之良遞進連營之領往膺茂渥無怠後勤可

蕃官慶州荔原堡左惟黨族孟怡大順城下骨咩族屈鬼蕃官慶州柔遠寨柳橋寨屈你可並充本族副軍主

勅具官某生長邊陲服習風化裔俗推其拳勇帥路稱其材資宜推柔遠之恩濯視通班之列仍加軍領俾率土豪祇膺寵章益念忠報可

蘇魏公文集卷三十四

宋太子太保右僕射同中書門下平章事司空魏國公蘇頌撰

逢年

裔孫萬靈重栞

外制

耀庭

尚書屯田郎中張巖可度支郎中

勅某三省左曹之聯一方漕輓之寄皆朝廷清要之選也非得優通敏裕之士豈嘗輕授之哉以爾文中雋科仕登朝路用能治劇擢贊計於甘泉屬委使華出案條於閩部休有聲采稔於人言方攸司之議年嘉治課之應最特遷支度之列且酬伐閱之勞茂對寵光彌勤達業可

太常博士張戩可依前官充監察御史裏行

勅御史之職所以振舉臺綱糾正朝位顧其責任豈易其人以爾具官某典學修詞決科從仕時推幹敏之裕加有端良之稱肅政掄才中司言狀俾從簪笏之選入聯棲鳳之班勉務直繩副茲清舉可

太子賓客解竇王可守工部侍郎致仕

勅引年謝事禮經之訓也優賢佚老王者之政也矧夫官列三品壽彌六紀惟其進退之際豈無旌異之恩以爾具官某久歷闈朝嘗踐臺閣進陟儲賓之貴出分郡組之榮以老自言知止可尚起部貳卿之秩東牟喬木之邦遂爾榮歸加其寵命俾優游於里閭益保養於天和可

將仕郎試秘書省校書郎充國子監直講焦千之可大理寺丞依前充職散官如故

勅具官某昔唐之學官歲終考其殿最本朝之制限以年資擢才校功其義一也爾以敦樸有道薦於士鄉經術通明寔在庠序外內更試於今五年願其施為是可官使進丞卿寺之屬仍准師儒之聯益懋爾能以副遠用可

職方員外郎夏旻可屯田郎中駕部員外郎俞康直可虞部郎中散官如故虞部員外郎鄭諤可職方員外郎散官如故虞部員外郎姜正顏可比部員外郎國子博士傅共可虞部員外郎

勅具官某周之六廉唐之四善皆天官比吏之法今之考課參用其制視功賦祿嚴惟舊哉以爾早聯闈臺稔服吏政一官恪次四歲於茲治以最聞行無過事稽於有司之令應彼增秩之條勉思忠規以對休命可

祠部郎中充集賢校理丁諷可金部郎中依前集賢校理散官如故

勅尚書郎皆謂之清望而左曹尤貴今雖限年序擢自非臺閣之選不得預遷焉以爾具官某地胄高華器質和厚榮踐世職稔服省闈會課應條進曹有典自列諱終之禮且援換秩之科易以司金皆聯左戶往膺寵異之渥益懋公忠之為可尚書虞部員外郎張興宗可尚書比部員外郎秘書丞費琦可太常博士勅具官某等夫尚書副郎奉常掌故皆臺閣之顯秩非俊良而不登考課而遷蓋躋善最以爾等或仕承世閥或文中秀科咸有吏資之明歷更民政之美姑緣歲比敘進班聯且增寵於外官當益勤於治狀可

昭宣使入內侍副都知忠州刺史張若水可充陵州團練使仍舊昭宣使入內侍省內侍副都知

勅朕纂承丕緒尊事兩宮按故事以薦崇名揆嘉辰而考成室方慶晨昏之奉豈忘典領之勞寵以華資旌其幹裕以爾具官某早推忠蓋久侍禁嚴出護塞垣之防入聯內監之長夙宵匪懈績用兼優屬中寢之即安嘉庀工之無曠俾因符守進領兵團外參握節之榮內重珥璫之責恩褒益茂報効宜堅可

皇兄茂州防禦使申國公世清可特降依前左武衛大將軍郢州防禦使申

國公

勅國家並建戚藩所以惇敘於九族優加命數所以表異於諸王惟繼世之既殊固推恩而必異豈容僭冒以躐寵榮以爾具官某胄出皇支系承公國間膺嗣爵之貴靡念亢宗之艱而乃屢上奏章自言統嫡有司定議當從別祖之封季春詔書已格泛遽之典弗思悛止重有敷陳意在微榮益彰矯妄宜從貶秩之責仍罷奉朝之趨尚違省於過尤勉欽承於彝訓可

大理寺丞李得臣可守太子中舍光祿寺丞吳立禮可著作佐郎

勅具官某爾籍隸京司職更民政廉方之守既已效於官成累久之勤茲亦應乎功令甄醜於善最俾敘進於榮資爾其欽承以永來譽可

前號州號署縣令錢公頴可大理寺丞前代州軍事判官張佑前權知果州

團練判官鄭士衡可並著作佐郎

勅某官等今之仕於郡縣者既限以積累之資則其器能可見矣又難以保任之法則其操守可知矣會課來上闕實靡差實之京司是謂慎選以爾等或起於門調或進自儒科典邑佐州咸有善狀廷尉之屬蘭臺之聯皆曰美官俾之並命偕此榮路益思後勤可

前岢嵐軍嵐谷縣令陳安靜前威勝軍武鄉縣令張焯可並著作佐郎前永
州零陵縣令梁宏可大理寺丞

勅具官某國家掄才之路至廣而銓選之法惟艱既限其累年之勞又責於上官
之薦小不應格未嘗序遷以爾勤於首公廉而寡悔知己言狀有司校功擢置王
官進階榮路其思始卒之効以副獎拔之恩可

大理寺丞致仕趙賁可太子中舍致仕

勅某向者大賚天下增秩庶官退休之人所宜先及蓋知止之可尚而高年之當
禮也爾早由仕綴得謝感長洊逢慶恩並應陟典擢列朝閣之籍足為暮齒之榮
服我殊私益嚮多祉可

大理寺太祝賈公述可舊官服闋

勅具官某服勤効智早列周行銜恤去官近終喪紀日月云邁編禕已除宜還簪
紱之榮來就班聯之次勉思移孝式矜揚名可

大理寺丞馬孝孫可太子中舍

勅具官某今之任者去銓調而列京司由考課而陟朝著雖序進之惟舊亦審覈
之良艱爾向以幹廉從知己之薦今用年次應有司之條遷秩儲坊通班閣籍惟

爾試吏之久宜稔修方之勤漸履榮階更圖來效可

衛尉寺丞劉士彥可大理寺丞大理評事田彥卿可將作監丞太常寺太祝
孫龜年可大理評事

勅具官某等出於華胄能紹世風並仕方初服勤可紀既更筮庫之效且收歲月
之勞稍進一官漸陞榮路爾其勉懋以副甄陞可

大理寺法直樊功立可光祿寺丞充大理檢法官

勅具官某祖宗以來慎用刑辟詳評審復以求厥中凡在理官實重其選以爾拔
從銓調職於平廷持法不苛校年應格進擢膳丞之列仍司契令之煩益盡乃心
往贊而長可

守鄧州錄事參軍前監道州黃富場員素可大理評事致仕

勅具官某久從銓調洊著吏勤既引年而自陳願還事而休老嘉其退尚之佚特
示寵遷之恩增秩京司歸榮里社往欽厚渥足慰素懷可

虢州朱陽縣主簿李庚可國子監丞致仕

勅某爾仕於州縣而能持已以廉不蹈尤悔齒既耄矣自言不能是亦知止可嘉
者也秩以成均之僚俾為晚節之寵服我恩渥歸安里閭可

太皇太后遇同天節親堂姪內殿崇班曹誨男易可太常寺奉禮郎

勅某近者朕以載誕之辰承顏之禮乃眷近屬例均慶恩以爾長信之諸侯舊勳之昆裔嘉其幼立延以京司當念起家之榮無忘學古之訓可

京朝官知縣磨勘詞

勅具官某廉能之選早列於仕階撫字之求方紆於邑綬屬攸司之比課謂滿歲以應條進以一官甄其累效勉思勤儆往服恩榮可

承制以上磨勘詞

勅具官某夫仕者久而不遷則才愚同滯進而不以其效則流品弗甄今有司所以限年而校功循階而進秩者由此道也爾以材武擢於治朝內外煩使之勞沆無曠事歲月薦更之比已應陟書稍陞等於官勞且疇庸於閥閱往承新渥無怠後勤可

莊宅副使兼閣門通事舍人周永清文思副使賈秀可並右騏驎副使

勅具官某夫守邊乘障之臣或失於悍勇而輕進或失於畏懼而不為向非練習之有方何以綏懷而得所既彰陳力何吝賞勞以爾擢自周行列於遠塞深識兵要復知敵情嘉其任事之能宜有宿官之寵內司峻秩躡等而還益思忠蓋之誠

魚委公文集 卷二十四
式副褒優之命可

文思副使任有方西京左藏庫副使錢昌符可左驍衛將軍致仕供備庫副使馬清可左武衛將軍致仕

勅具官某夫陳力而仕不能則止是亦如夫進退之分者也得不優以名秩徇其素心故以爾武幹吏資仕於班列勤勞之役更歷固多以疾告休所宜矜惜特遣環尹之列俾為里閭之榮服我殊私保爾多祜可

供備庫副使侯元吉可西京左藏庫副使西京左藏庫副使王思可文思副使東頭供奉官施惠可內殿崇班

勅具官某國家官人之法靡有文武之異一用考格限年敘遷所以嘉久職而勸吏勞也以爾早列周行繇更吏幹廉能之守固有可嘉歲月之榮亦應茲令進秩一等漸履榮階益思忠蓋之方以副甄陞之命可

內殿承制楊從先可西京左藏庫副使

勅具官某夫盜積山藪不時翦除則鄉閭之間人靡安堵乃嚴賞格以勸事勞爾為廷臣出司巡警能用方畧屏擒寇奸兇徒既除遠民無患校其勲等當有優遷躡陞內使之聯用獎武才之效欽承渥命益懋來勤可

內殿承制杜該許士孫可並供備庫副使

勅某等或有武幹服在殿塗或案獄於邦刑副我欽恤或訓齊於州旅不懈拊循質歲課以薦周嘉吏勞之可紀宜推陟典擢貳使聯勉思宿業之勤以稱褒思之渥可

前內殿承制宋景先可舊官服闋

勅具官某爾為三班吏有年數矣曩逢慶渥當陟內朝復用歲勞再遷殿著屬雅親恤遂去邦聯日月其除祥禱俄畢宜悉還於舊次俾入敘於周行祇服恩榮益虔事守可

內殿崇班阮大有可內殿承制

勅具官某奉朝內著秩視閤籍之榮奏課中樞歲比吏能之最允如今格何吝恩褒以爾久踐通班亦更煩使勤庸可紀遷次有常進升等級之優用示才勞之勩勉收成效無懈守官可

未復舊官人內殿崇班蘇濬可內殿承制

勅具官某郊祀之澤其施普矣在位者加以勲等左遷者還其職秩所以示記功忘過之義也以爾早列周行嘗結吏議褫官斯久逢慶云初俾進復於舊聯宜益

思於後效可

東頭供奉官閣門祇候趙思齊可內殿崇班依舊閣門祇候

勅具官某爾以禁廷之聯通上閣之直贊名典謁服職有年校其事勞嘉有善狀考課之令遷秩有常擢列殿塗之榮仍參門籍之貴惟爾舊族歷仕近班當懋舉於官儀且無忘於世美可

東頭供奉官張宣禮朱興可內殿崇班

勅具官某爾補吏三班有年數矣而能勤於治職謹而寡尤校其事勞甫應遷格宜陞華於殿著且通籍於朝聯益思遷次之艱更圖報稱之效可

天武右第三軍都指揮使昌州刺史胡元可武衛將軍致仕

勅具官某夫壯而陳其力老而謝其事因當優異使之便安以爾歷職和門兼榮州祭迫於衰耄願遂歸休擢居環衛之聯俾遂養頤之適欽承寵命足慰暮年可翰林醫官守少府監主簿陳易簡翰林醫官守勤州富林縣主簿秦宗古可並守殿中省尚藥奉御依前充翰林醫官

勅具官某周官醫師有上士中士之秩每歲稽其醫事而制其祿食所以校能否而驕勤勞也以爾學農黃之書通和扁之技隸名中禁恪職有年特陞六尚之聯

益懋十全之效服茲優典無懈厥官可

皇太后殿樊氏可典賓馮氏可典贊吳氏可掌籍楊氏可掌記

勅周官女史掌內宮內令之法則今兩宮給事之職是矣閱歲既久增秩其宜皇太后殿具官某氏言德有聞閑和自飭早陞宮掖祇奉母儀嘉其積勤推以優渥俾進司於典掌宜益務於欽承可

太皇太后殿典言吳氏可司設典言杜氏可司正吳氏可典贊李氏可典記
花氏可典珍張氏可典綵劉氏可典正王氏可典計董氏可典設

勅宮省有秩典司各殊矧長信之置官事掖庭而寢久宜頒渥命用獎能勤太皇太后殿具官某氏性稟閑和體姿柔婉自入承於嬪御嘉薦歷於歲華遞陞婦式之班俾重慈闈之侍往膺恩渥無怠祇欽可

檢校尚書水部員外郎充成州團練副使吳靚可依前檢校尚書水部員外郎充定國軍節度行軍司馬不得簽書本州公事

勅具官某赦者所以推大德於天下靡有違邇咸與維新矧曰士人可無銓敘以爾早通閩籍自致敗官黜佐方州再逢恩霈宜稍遷於大府尚無誑於散僚益思省循佇期甄錄可

檢校水部員外郎充秀州團練副使鄭民先可依前檢校官充昭慶軍節度行軍司馬不得簽書公事

勅某近歲之法以賄敗官者雖坐輕典亦置之散秩所以責廉隅於士大夫也爾一絀吏議於茲有年慶恩滌瑕府佐移秩其益思於修省毋自怵於廢淹收之晚年豈終汝棄可

萬載縣尉劉永清可蔡州真陽縣令

勅夫民愚無知至為剽盜賊殺不辜其惡甚矣爾作尉遠邑能勤厥官奸兇就擒即寘於法捕賞之格表勸在焉命爾長民疇茲成效高圖來譽以副寵遷可

相州安陽縣尉劉子駿可知蘇州錄事參軍

勅具官某爾為邑尉而能擒捕寇攘肅清里閭斯謂善於其職得不酬之以恩擢糾郡綱用勸能者益勤後效式佇甄陞可

秘書監致仕祝正辭男延賞可守將作監主簿

勅某士大夫以老致為臣而歸斯亦始終之節可尚者得不延以世祿而慰其素懷乎矧爾父歷仕三品年至告歸秩爾京司是謂優典爾其勉懋以亢厥宗可

光祿卿陳鑄遺表第四男公彥可試秘書省校書郎

勅某生而任其力歿而恤其家此朝廷所以篤羣臣始卒之義也爾父致位諸卿考終明代祈爾一命以承厥家俾試秩於蓬邱且聯華於郡幕服茲厚寵勿怠清修可

光祿卿知楚州寶彭男太廟齋郎汝礪可試秘書省校書郎

勅某任子之令尚矣雖班等有異而世仕為優乃父方居於列卿嚴禮屬逢於大滯漸爾試秩使之起家茲為階漸之榮宜務清修之誨可

太常少卿直龍圖閣知廣州張田遺表男輔之可試將作監主簿

勅某爾父才質器幹時推能臣宣力四方著構五嶺不幸淪棄用茲憫傷俾爾一官以續其世爾其深自勉懋期於有成且無忘厥考之勤事也可

禮部侍郎致仕盧士宗孫盧君佐君傑可並將仕郎試秘書省校書郎

勅某時乃大父朝之舊臣方告老以言歸宜推恩而及後嘉爾幼力能紹素風特優試秩之榮俾遂承家之美無忘善訓往服殊私可

守許州長史李評可守鄭州長史

勅某向虧廉守遂絺刑章寘於散曹示不終廢再逢寬宥從蒞便州尚思省循毋謂沈邱可

尚書屯田郎中致仕姜鎬男子厚可試秘書省校書郎

勅某爾父仕歷閭臺位正郎列不待年至謝事而歸惟退尚之可嘉宜賞延之及嗣命爾試秩俾承厥家勉慕前修毋墜門構可

追官人前儒林郎守司戶參軍尹良佐可鄭州別駕

勅具官某爾作掾列曹在法除籍適均需典稍濯前愆收於州佐之聯無謂恩章之薄可

光州團練使同提舉集禧觀公事向經奏百姓醫人華詢可試國子四門助教勅某方技自名診治盡善屬攬通侯之奏且援試秩之科操術既明推恩何吝祇膺一命之渥益務十全之能可

西京留司御史臺正名知班驅使官王德明可將仕郎守蓬州蓬山縣主簿
勅留

勅某隸名憲府給事西臺閱歲再周勤公寡過命勾書於遠邑尚留職於故曹彌思恪恭無怠朝夕可

河東進納空名助教三十道

勅某昔卜式請輸其家半財以助邊費漢世善之爾能發貨責應募郡國嘉其誠

意宜有甄表假以州秩俾榮鄉閭承茲渥恩用勸厥眾可

蕃官右武衛將軍兼監察御史柱國香布咩布噉移可並加上柱國右監門
衛將軍兼侍御史駙騎衛懷宗旦右監門衛將軍兼監察御史武驍尉菟
名山可並加騎都尉

勅具官某向者禮行秦時恩浹羣方眷言忠順之臣宜厚龐鴻之澤以爾才雄邊
部心邈本朝環衛榮階早膺於嘉命禋燔慶渥特霑於殊私進加勳級之華益壯
裔藩之觀爰茲受寵無怠勤王可

府州靖化保屯毛州族子弟屈移可銀酒監武充本族副都軍主

勅某爾父世居邊土籍隸轅門俄遭疾以淪亡覽守臣之保任言爾勤事宜承舊
名往膺甄擢之恩益務撫寧之效可

封贈

南郊百官封贈父母妻共五道

七父

勅某夫為人子者以揚名顯親為孝非夫委質昭代陳力周行則安能推榮以逮
先世曩朕郊邱已事之日肆慶天下乃俾士大夫得以陳追述之請所以隆舊章

而慶孝治也以爾生而慶善之積志不得充歿而緒餘之傳報乃在後嘉爾有子
仕吾通閩屬霈恩之普加推卹典以示厚營魂未泯沛澤斯永可

亡母

勅某郊為大祭既格於上下神祇惠浹庶邦靡間於幽明隱顯矧乃闈朝之士有
懷鞠育之恩爰舉慈章優加寵命以爾婦德之順既宜其家母道之修遂貽厥子
屬精禋之霈澤昨封邑以開榮用增飾壤之恩茲慰寒泉之感可

父在

勅某朕初卜郊大賚天下無有遠邇均蒙福釐乃眷在廷之臣咸切逮親之寵因
推朝渥庸達孝心以爾某善積於躬慶延厥後有子而仕通籍於朝宜承霈澤之
榮茲顯教忠之美永錫爾祚對時之休可

母在

勅具官某母某氏迺者朕郊見天地裸獻祖宗承神之休均澤於下嘉我庶士方
逮承顏之榮宜推渙恩用彰錫類之美以爾慈嚴之範見推內嫻鞠育之仁成乃
子志舉茲慶典進以邑封欽膺褒寵之光益享壽康之報可

妻

勅具官某妻某氏古者上有大澤則惠必及下祭其是歟日朕初見郊廟承神之休雖福於天下士之立朝者既已加乎恩級而又推榮及乎私室其惠澤可謂大矣以爾能執婦道歸壻士家時惟爾儀服我朝案舉茲慶賜之典寵以封號之榮茂對殊私益勤內助可

兩制母在改封

勅郊祭之推恩也上以均天地之貺下以揚祖宗之休福釐紛然中外時若嘉我髦士方遠承顏之榮厚其寵章用光錫類之祉具官某母某氏慈嚴有度明智兩通從夫之賢固多內助之美有子而貴尚深側眄之規克成令名服在清禁宜躋封於大郡且旌善於北堂欽承優渥之恩益享壽康之福可

兩制妻改封

勅祭有惠下之文所以明神貺婦有從夫之責所以厚人倫禮燔方畢於陽郊慶澤用霈於家壺具官某妻某氏德通四教行表六嫺詠君子之好逑嬪風素懋循大夫之法度內治尤彰列予近班實惟爾特屬遷邦熙之慶宜旌主饋之賢寵以封君進乎善郡祇服褒華之渥益宣輔佐之勤可

太常少卿田照鄰母彭城縣太君劉氏封仁壽郡太君

勅朕向以初郊大賚加禮高年有疏封錫命之榮緣貴老近親之義某早鍾善慶克享期頤從子方仕於亞卿承顏既嘉其逮養攬州僚之列奏寵壽母以宜優特出殊私進加善郡為爾慈堂之美彰我孝治之風可

故內殿崇班范愿妻錢氏可封永寧縣君

勅夫封疆之臣既以死而勤事朝廷之法當加等以推恩念往矜存用旌壯節以爾具官某妻某氏良家之子能臣之妻屬乃夫之戍邊由捍寇而畢命爰推殊渥俾逮厥家特疏湯沐之封用表閨門之美欽承恩獎善撫悖孤可

遼山縣令賈祥母著作佐郎周綸母並年九十一歲封縣君南宮縣令董京父年九十一歲可守秘書省校書郎

勅某向者已事泰壇均釐列位厥有親年之耄未登封賞之科特需殊私式彰孝治以爾壽康之福實應詔求慶善所終誠宜表顯寵以遵邠之列益保餘齡無忘休渥可湯邑之號用子舍之榮

歸州巴東縣令元大章母年九十一歲封長壽縣君

勅某夫耄期之前前世之所加禮者曩緣郊慶特俾推恩以爾既壽且康從子而仕茲誠五福之所嚮是亦積善之有憑寵以邑封旌其孝養往承茂渥益享遐齡可

台州百姓王延贊年一百一歲求歸一百二歲可並守本州助教

勅某夫貴老尚齒王政之所先矧夫百年之人五福之貴者得不加禮而優寵之乎以爾居鄉有間介壽克永宜因郊慶之澤假以州秩之榮且俾里閭知所推尚斯亦有助於風教也可

南郊致仕率府副率加恩

勅某祭有大澤惠均庶工屬郊時之禮成眷邱園之佚老例推優渥敘進榮階祇服恩華足慰恬尚可

南郊諸州軍衙前加恩

勅某服勞吏役歷稔公庭屬逢郊霈之恩宜被言綸之命例加試秩用獎久勤可

同安喬孫萬靈錫經

逢年辨明

晉爵耀庭

允恭子敬全校字